

Basef Amama Pol Nali' Nanda'am Mafe'ma Esis Korin

Basef bandami Pol nali' nanda'am mafe'ma esis Korin

1:1-9 Pol nanifela Goda esis Kristen sape Korin

1:10-4:21 Esis Kristen Korin sandawal biefis ea' Pol na'ipasa basefa waf hianai Kraisi naloma waf amam aposel manda'anai

5:1-7:40 Esis Kristen sanda' anona waf aonai ea' Pol na'ipasa waf bu'unai daso'amainai

8:1-11:1 Pol na'ipasa basefa mafis enis saham sondolalima god baso'omunai. Ea' nafela ukup asasimi ma sundumafuma. Na'ama sila waf aonai esis Israel fowa' gani sanda'anai.

11:2-14:40 Waf sagwa' gwa'aimi Jisasi naloma waf Godi nase'as presen hianai bu'unai

15:1-58 Basef ofagema ma Kraisi nohafel wapoti'

16:1-4 Basef Poli akutaimi maloma basefa danifel ananinai. Otamba esis Korin sakolasom mafe'ma enis kwahusi

16:5-24 Pol na'i basef akutaimi maloma danifel ananinai

1 ¹⁻²Ae' Pol aposel Jisasi Kraisi anda' maol ananinai. Okom Godi atona nofale nandandepe anda' maol anama. Ae' aloma owalomapa Sostenes wape na'ae wasapa' danifel ma nemaf bu'unai nefe'mago ipe' amam nematawa Kristen pape Korin. Ea' anda' basef amama mafe'mago ipe'. Ipe' pape la'ifipa paloma Kraisi Jisasi, God nanda'epa pape bo'wepa nofalepa nosahe'epa ea' Ananipei etipa. Afa' biafa wase'epa danifel ma ipe' paloma epes hiesi ma wambel hiagoma sofala agel Dembinai ape'inai Jisasi Kraisi, Anan Dembinai ma ape', esis wapoti'.

³Afa' biafa wa'i God ape'inai noloma Dembinai ape'inai Jisasi Kraisi mihiambamepago na'a monda' opalef ipe'imi mope awanem.

Pol nanifela God

⁴Ae' anifela God la'ela'efa ipe'. Dei' main, ipe' pape la'ifipama Krai Jisas ea' God nandahomepa pape andeande'ma Anan atona. ⁵Ipe' pape la'ifipama Krai pape andeande' endilisi ea' pefa' basef hiami pa'iami maloma gawa hianai bu'unai naninani. ⁶Dei' main, basef amama bu'wami Kraisi afa' wawalapami mataga alihim mandawalap la'ifima opalef ipe'imi. ⁷Ea' dei' ipe' pape ukup mohafel endilisi pehafa Dembinai ape'inai Jisas Krai anona nemaf notaga nondawalap alihina. Nemaf anama pape pehafana pefa' presen hianai Ambal Bu'unai Godi nase'epana na'a. ⁸Jisas Krai nambimb nonda'epa ma pepe la'ifipa la'ela'ef pefe' petagama nemaf akutainai. Nemaf anama Dembinai ape'inai Jisas Krai niefi'ianai ipe' basef ofagema a'epa nemaf anama. ⁹God nanda' amamaga ananiami hi'alam andeande' nofalepa ma pepe la'ifipa opalef etifim peloma nogalomana Ananinai Jisas Krai Dembinai ape'inai.

Amam nematawa Kristen sandawal bieffis

¹⁰Ipe' sahin owan, a'ipipa basef la'ifimi ma agel Dembinai ape'inai Jisas Krai na'ama. Ipe' pepe wambota atona endilisi pepe opalef etifim. Penda'am na'ama ma ipe' pepe andeande' opalef etifim endilisi ma ipe' ina pendawal bieffipa. ¹¹Ipe' sahin owan ae'ipei, enis epes wambota Kloei sa'ipi sa'i ipe' etipa pafitap. ¹²Ae' a'i na'ama. Ipe' hipei atona etin pa'iam na'ama. Enis sa'i, "Ape' epes Poli." Enis sa'i, "Ape' epes Apolosi." Ea' enis sa'i, "Ape' epes Pitai." Ea' enis sa'i, "Ape' epes Kraisi."

¹³Ipe' panda'am na'ama ma main? Ipe' pa'i Krai nandawal wa'awa'ana? Ea' pa'i ae' Pol saunde lawag usi'inai tu'wanainai ma agiambamepa? Owa'etin. Ipe' ina pefa' baptaisa agel ae' Poli, owa'. ¹⁴Ae' fowa' anda' baptaisima amam amama ipe'imi biam, Krispus naloma Gaius atom. Ae' anifela Goda ina anda' baptaisima enis epes ipe'isi wapoti', owa'. ¹⁵Amama atom dei' enin epen ina ni'ipipa ni'i ipe' pefa' baptaisa agel ae'anai, owa'. ¹⁶(Endilisi, anda' baptaisima esis wambota Stefanasi wapoti', ea' ae' ina okom na'i enis wapoti', owa'.) ¹⁷Dei' main, Krai ina nasapa'e afil'ima enda' baptaisima enis epes, owa'. Anan nasapaho'ma ewalapa basef bu'wami Ananiami i'iam. Ae' ina ewalapam i'iam ila anona gawa amam gawaimi ma'ianai, owa'. Na'ama epes si'i basefa lawag usi'inai tu'wanainai Krai naga'manai si'i basef amama falafumi atom.

¹⁸Endilisi, epes isima sape eaf higililanai, esis ukup ma'i basefa lawag anama usi'inai tu'wanainai saunda Kraisanai sa'i basef amama falafumi atom. Ea' ape' amam nematawa dei' God nape nofa'apa motanimani mogawa basef amama pepel Godi atona.

¹⁹Si'i Baibel na'iam na'ama na'i,

“Anona nemaf ae' ehambombaga gawa epes isima gawaisi. Ea' emboma ukup epes isima gawaisi sa'i nomonas mamumami hiahiami mapaisi.”

²⁰Dei' amam gawaimi monda' mi'imama? Ea' amam gawaimi mogawa gawa hianai monda' main? Epes isima etap anae'i sa'i basef sapa'am sandahihanamam sonda' main? Owa'etin. God nanda' gawa epes isima etap anae'isi nataga falafunai si'i gawa epes isima sahaga sagaoli.

²¹Dei' main, God Anan gawainai na'i epes etapasasi ina la'ifisa sogawa Anan ma gawa anama asasinai atona, owa'. God nahopa eaf asasinai. Ea' anan okom na'i nofa'ai amam nematawa sombale'efanai sotanimani. Esis sombale'efa basef amama wa'ipasami epes etapasasi sa'i wafimi gawa a'ami.

Esis sembale'efa basef amama ea' God nefa'as sotanimani. ²²Esis Juda ukup maimaila siti ikwaf la'ifinai ea' esis Grik ukup ma'ima'i sofa' gawa hianai lu'unai. ²³Ea' afa' wawalapa basefa Kraisi naga' lawag usi'inai tu'wanainai. Basef amama mahopa eaf esis Juda sandaiwa'mam sa'i basef awami. Ea' esis Grik ukup ma'i basef amama wafimi gawa a'ami.

²⁴Ea' amam nematawa God nofalapai, esis Juda saloma esis Grik wapoti', basef amama ma'i Kraisi Anan pepel naloma gawa anama Godi. ²⁵Dei' main, basef amama Godi epes sa'i “Gawa a'ami wafimi”, amama gawaimi atom lu'wami mikila' gawa epesi. Ea' amamaga amama epes sa'i “Awami falafumi Godi”, amama la'ifim endilisi mikila' pepel epesi.

²⁶Alupipei ae'ipei, ipe' ata' ukup mi'li fowa' damba damba God nofalepa ma pembale'efa Kraisi. Ipe' hipei ina enis epes hiesi la'afena ipe' epes gawaisi ma etap anae', owa'. Owa' enis hiesi agof lu'wamisi. Owa' enis hiesi dembesi la'ifisi, owa'. ²⁷Ea' God okom ananinai atona nandandepa enis epesa sope Ananisi etis. Epes isima etapasasi sa'i gawa a'asi, ea' God nandandepas ea' ma sonda' epes gawaisi ambagof aom. Ea' epes isima etapasasi hiesi sa'i falafisi owa' la'ifisi, isima God nandandepas ea' ma sonda' epes isima dembesi la'ifisi ambagof aom. ²⁸Anan nandandepa epes isima amam nematawa etapasasi sa'i owa' la'ifisi, falafisi etis agof a'asi. Anan nandandepasa nohambombaga amamaga amama moloma epes isima la'ifisi agufisi etap anai'isi. ²⁹Nanda'am na'ama ma enis epes ina la'ifisa sefela agof asasimi atom lu'uma naep Godi, owa'. ³⁰God nahapona ipe' pape la'ifipa paloma Kraisi Jisas ea' God nanda' Kraisi nape ofagonama gawa ape'inai. Anan atona eaf ape'inai ma God nanda'apa mope bu'upai ma naep ananiami ma mope ananipai atepa. Anan atona natalepa nakwahepa ma waf aonai ma mape wafifipa. ³¹God nanda'am na'ama ma anom basef mail Baibeli ma'iam ma'i, “Emi egafis si'i sefela agof asasimi, esis sondanifel ama Dembinai atona.”

Pol nawalapa basefa Kraisi naga' lawag usi'inai tu'wanainai

2 ¹Alupipei ae'ipei, fowa' afe'mago ipe' awalapa basef endilisimi Godi ma ipe', ina awalapam a'iam aloma gawa ae'anai lu'unai, ma basef bu'wami a'ipipami, owa'.

²Dei' main, okom ae'anai na'i na'ama. Nema'f anama ae' ape alomepa ina ata' okom napoma anom basef, owa'. Okom nase'e ma anom amamaga. Ae' okom napoma Jisas Krai's atona, Anan naga' lawag usi'inai tu'wanainai.

³Amama atom nema'f anama ape alomepa, ae' owa' la'ifiwei. Ae' umbamahe etin ape. ⁴Ea' basef a'ia'ma basef bu'wami Kraisi, amama ina a'ia'ma gawa ae'anai aloma epesa efa'ipei, owa'. Ae' ihi'ambepa pepel Ambal Bu'unai Godi atona. ⁵Anda'am na'ama ma ipe' ina ukup maimaila gawa epesi dei' pembale'efa God, owa'. Anda'ama ipe' ukup mohafel mimila pepel Godi atona dei' pembale'efana.

Ambal Bu'unai Godi nase'apa gawa bu'unai

⁶Endilisi ae' awalapa basef gawa napaimi ma emi egafis sembale'efa God la'ifisi sanda' waf Ananinai. Ea' gawa anama ina gawa etapanai, o gawa amam agufumi ma etap anae' anona nema'f hegililam, owa'. ⁷Basef gawaimi ae' awalipasami, awalipasa basefa gawa Godi atona. Gawa anama fowa' nape nandambaho'ma epes, fowa' gani God ata' owa' nonda' etap anae' Anan nandandepa gawa anama ma ape' mofa' nafifili Ananinai. ⁸Owa' anona aman atotona agilinai ma etap anae' nogawa basefa gawa anama, owa'. I'i amam mogawana, dei' ina maunda Dembinai lawag usi'inai tu'wanainai, owa'. Anan agel lu'unai endilisi. ⁹Ea' ae' a'i basefa gawa anama si'i Baibel na'i,

“Amamaga maim God nandondombam ea' ma emi egafis ukup maila Anan endilisi, amama mikila' ukup epesi. Esi's ina la'ifisa same'am satolom sagawama ukup maloma naep aligah asasi'mi, owa'.”

¹⁰Ea' God nawalapama amamaga amama mandawalapama ape' ma Ambal Bu'unai Ananinai. Ambal Godi nagolopa amamaga hiami mape mandamabahi'i, ea' nogawa waf Godi nape nandambahi'i. ¹¹Dei' emi egafis segawa ukup epesi? Owa'. Ambagof epesi atom mogawam. Ea' na'ama etin, ina enin epen nagawa okom Godi, owa'. Ambal Bu'unai Ananinai atona nagawana. ¹²Ape' ina mofa' spirit ambal etapanai, owa'. Ape' dei' mofa' Ambal Bu'unai nape naloma God nafi'i ma mogawa amamaga maim God nase'apam na'ai.

¹³Basef amama ina gawa epesi sa'ipiam, owa'. Amama basef Ambal Bu'unai Godi nawalapameam. Dei' a'lipasa basef amama awalapam a'ia'ma Ambal Bu'unai Godi awalipa epes isima Ambal Godi napaisi.

¹⁴Ea' emi egafis Ambal Bu'unai Godi a'asi, esis ina la'ifisa sofa' amamaga amama bu'wami mataga Ambal Godi, owa'. Epes isima ukup ma'i amama sa'i falafumi sanda' ki de'iafam. Esi's ina segawam, owa'. Dei' main, Ambal Bu'unai Godi atona nawalipasa amama ofagema ma ape' mogawam.

¹⁵Emi egafis Ambal Bu'unai Godi napaisi, esis sowaloga amamaga hiami. Ea' ina enis epes la'ifisa sowaloga wafa epen inima Ambal Godi napaini, owa'.

¹⁶Si'i Baibel na'i, "Dei' emi egafis sogawa okom Dembinai ma nambimb la'ifisa si'ipana anom basef? Owa'etin."

Ea' dei' ape' okom Kraisi napaipa.

Amam manda' maol siosi amama manda' maol Godi

3 ¹Alupipei, fowa' ae' ina a'ipipa basef si'i a'ipasam epes isima saila okom Ambal Bu'unai Godi, owa'. A'ipipam si'i a'ipasam epes isima ukup maso'asa basef ofagema Godi, si'i awasi ata' sa' nomagof atomi. ²Fowa' ase'epa nomagof atom. Ina dei' ase'epa gwa'aimi la'ifimi, ata' owa'. Dei' main, ipe' ina la'ifipa, ata' owa'. Ae' a'iam endilisi, ipe' dei' wapoti' ata' owa'. ³Dei' main, ipe' ata' pape la'ela'ef paila waf etapanai. Endilisi, waf anama nawalapai waf kowalasanai naloma ukup aoma sahin owan ma basef safitapami ata' mape la'ela'efa ipe'. Amama mihi'amba ape' hiapai ipe' ata' paila waf anama aonai etapanai. Waf anama epes etapesi atona. ⁴Enin epen na'i, "Ae' epen Poli." Enin na'i, "Ae' epen Apolosi." Waf anama nawalapa ipe' ata' pape si'i epes paila waf etapanai atona.

⁵Ipe' ata' ukup motamea andeande'. Apolos emi egafuna? Ae' Pol emi egafowe? Afa' biafa wanda' maoli atofa. Dembinai nase'afa maol nandandafa. Ea' maol anama afa' biafa wanda'anai, eaf anama atona dei' ipe' pembale'efa Kraisi. Ape' hiapai manda' maol anama God nasi'ipami. ⁶Ae' ali' awalipipa basef Godi si'i ewaha olelemb gwa'aimi, ea' Apolos nagi' nakolo' embel nasa'opam. Ea' God atotona nanda'am mataga. ⁷Ea' dei' epen inima newaha olelemb gwa'aimi, enin agel a'ana. Ea' epen nakolo' embel nasa'opami enin wapoti' agel a'ana, ea' God nanda' gwa'aimi amama matagai, Anan nefa' agel lu'unai. ⁸Ea' epen inima newaha olelemb gwa'aimi naloma epen inima nakolo' embel nasa'opami, esis bias sanda' maol anama atona. Ea' esis bias atona etin anona nemaf sofa' amamaga mandahama maol sanda'anai. ⁹Afa' biafa wanda' maol etifinama God. Ea' ipe' si'i aof Ananinai. Ea' ipe' si'i ipat Godi.

Amam manda' maola siosi si'i manda' ifagwi

¹⁰God nandahome. Ea' Anan nanda' ae' ataga ape' si'i epen gawainai nanda' ifagwi. Ea' awa olaf nape nali'i ea' enis sala' ipat natomana. Ea' epes hiesi atona etin sundumafuma andeande' sola' ipat notoma olaf anama. ¹¹Ipe' pegawa God nanda' Jisas Kraisi nape nali' si'i olaf notawa nali'i. Amama atom ina ata' enin epen la'ifina newa anona olaf wapoti', owa'etin. ¹²I'i emi egafis si'i sola' ipat notoma olaf anama ilifi sola'ana, esis sonda' gol sola'ana o sonda' siliwa sola'ana, o sonda' anom otamba salatamami sola'ana, o sonda' lawah o sonda' walol o otalef alimi sola'ana. ¹³Nemaf anama Kraisi niefi'ianai maol anama epes hiesi sanda'anai notaga nondawalap alihina nope bo'ona o aona. Nemaf anama

notaga noloma nif lu'wami. Ea' nif amama mondo maol anama hianai ma epes hiesi atona etin hi'ilasa sogawa maol asasinai bo'ona o aona. ¹⁴I'i enin epen nola' ipat notoma olaf anama ilifi ma nif owa' fendona, anona nemaf nefa' anom amamaga bu'wami. ¹⁵Ea' i'i ipat epen nanda' maoli fendona hi'ilana, anona nemaf ina nefa' amamaga bu'wami, owa'. Endilisi God nofa'ana notanimani, ea' amamaga a'ana nepe na'a si'i epen netanima nandalo' nifi.

Sios amam nematawa Godi si'i ipat lu'unai Ananinai

¹⁶Ipe' pegawa o owa'? Ipe' etipa si'i ipat lu'unai Godi, ea' Ambal Bu'unai Ananinai nape nomona opalef ipe'imi. ¹⁷I'i emi egafis sohambombaga ipat anama Godi, anona nemaf God nohambombaga epes isima. Dei' main, ipat anama Ananinai bo'ona andeande'. Anama ea' ipe' etipa.

Ape' ina mefela agof epesi, owa'

¹⁸Na'ama ipe' pembaso'ma ipe' etipa. I'i emi egalin ipe'inai okom ni'i enin gawaini si'i epes etapasi sofalasi, epen inima andeande'ma nemboma okom ananinai ata' netaga okom nahaga nagaolani nili' ma nambimb netaga epen gawaini endilisi. ¹⁹Dei' main, gawa etapanai anama falafunai si'i basef epes ukup maso'asi sa'iami ma naep Godi. Si'i Baibel na'iam na'i, "God nofa' epes gawaisi ma waf gawainai naninani asasinai atona baso'omainai si'i epes saha mafis esalef."

²⁰Ea' Baibel na'iam wapoti' na'ama na'i, "Dembinau nogawa nomonas epes gawaisi falafumi atom."

²¹Ea' enin epen ina nefela agof ape' epesi, owa'. Amamaga hiami ipe'imi atom. ²²Pol naloma Apolos naloma Pita, amam ipe'imi atom. Etap anae' naloma ambal namunai naloma ga' naloma amamaga dei' mapani, anona nemaf migi' meatagai, amama hiami ipe'imi atom. ²³Ea' ipe' epes Kraisi Jisasi ea' Anan Godi.

Anona nemaf Dembinai atona nowaloga amam manda' maol Ananinai

4 ¹Ipe' pegawa afa' wanda' maol Kraisi umafi basef endilisimi Godi fowa' mape mandambahi'i dei' mataga mandawalap alihim. ²I'i aman dembinai nose'ana maol enin epena nimafianai, enin nimafiana nenda'ana andeande' hi'ilana. ³I'i ipe' pewaloga waf ae'anai ma enis epes sonda'me kot sowaloga waf ae'anai, ae' okom na'i amama falafumi atom. Ae' wapoti' ae' atowe ina awaloga waf ae'anai, owa'. ⁴Endilisi, basef mape opaf ae'anai nomon ma'iami ae' ina ati anona waf aonai anda'anai, owa'. Ea' amama ina mihi'ambe endilisi ma i'i, "Ae' epen bu'uweu andeande'," owa'. Anona nemaf Dembinai atona nowaloga waf ae'anai. ⁵Ea' dei' nogota dende'anai ata' owa'. Ipe' owa' pewaloga waf enin epen nanda'anai, owa'. Ipe' ata' pepe pehafa nemaf anama

Dembinaï niefi'ianai. Nemaŋ anama anan nowalapai amamaga hiami mandamabaho' mape akoti motaga mondawalap howalagoma. Nemaŋ anama Anan nowalapa ukup epes hiesi mape mandambahi'i motaga mondawalap alihim. Ea' God ni'ipapa baseŋ ananiami ape' hiapai atona etin mondahama maol ape' manda'anai, bo'ona o aona.

Esis Korin safela agof asasimi atom

⁶Alupipei, ae' okom na'i igiambamepa. Amama atom ae' aloma Apolos wihi'ambepa baseŋ amama do'ok a'ipipami ofagema ma waf afa'inai. Afa' wanda'am na'ama ma ipe' pelafa waf ape'inai baseŋ amama ofagema ma'iam ma'i, "Ipe' ina pimbisila' mi'uli anama, owa'."

Ea' dei' ipe' ina pesambala baseŋ pefela agola anona aman, owa'.
⁷Alupipei, ipe' ukup mape ma'imama? Emi nanda'epa pape dembipei pikila' enis epes? Amamaga amama hiami God atona nase'epam. Ea' ipe' ina pesambala baseŋ pi'i ipe' etipa dembipei la'ifipei, owa'. Amamaga amama hiami ipe'imi, God atona nase'epam.

⁸Endilisi, opaleŋ ipe'imi si'im ea'! Ipe' amamaga hiamipei si'ipa dende'! Ipe' pikila'afa pataga dembipei king! Uwahipipa! Ae' okom na'i endilisi ma petaga pepe dembipei king nambimb ope dembifai king olomepa!

⁹Ae' okom na'i na'ama a'i God nanda' afa' aposel si'i epes sape agof a'asi sagi' endilisi. Epes hiesi hi'alas sape ilif etapi saloma amam ensel wapoti' satolofa wandahama epes isima atuwasi sohas seaga'i. ¹⁰Afa' wape si'i epes ukup maso'asi ma ofela agel Kraisi, ea' ipe' pape epes gawaipei ma waf Ananinai. Afa' owa' la'ififa, ea' ipe' la'ifipa. Ipe' agof lu'wami, afa' agof a'afa. ¹¹Fowa' gani wapoti' nafi'i nataga nogota anae' wape nolomahafa batag fafatimufa endilisi, ea' luwaguf hiahaom a'afa. Esi sumagwi lagof sahafa etin. Afa' wambel a'afa ma ofe' weape andeande'.

¹²Wanda' maol lu'unai endilisi ma lagof afa'imi atom. Esi sa'i baseŋ sanda'afa findiwafa ea' afa' la'ififa ofalo'mas wagwamasa baseŋ bu'wami atom. Esi sanda'afa aofa, wape la'ififa watilis, afa' ina wagwamas, owa'.

¹³Esi sa'ipafa baseŋ awami endilisi ea' afa' wagwamasa baseŋ awanemi sa'osa'ombel. Wataga si'i alufuta awasimi endilisi ma etap hiagoma si'i alogw maimailami, si'i etap awagoma alufuta nana'oma. Fowa' gani wape na'ama etin wafi'i wataga dei'.

Pol na'ipa esis Korin na'i, "Pila waf ae'anai."

¹⁴Ae' ina anda' baseŋ amama ma monda'epa ambagof ipe'imi aom, owa'. Ae' okom nainailipa si'i awasi ae'ipei, a'i iwalapa nomonas ipe'imi. ¹⁵I'i endilisi ipe' amam mowalipipa baseŋ Kraisi 10,000-peleim ea' hapaimi, ahapepa ipe'imi ina hiam, owa'. Waf Kraisi Jisasi atona ae' atowe ape ahalomepa ipe'iwei, ipe' pataga batawisi ae'ipei ma baseŋ bu'wami Godi awalipipami. ¹⁶Amama atom dei' afela ukup ipe'imi ma pila waf

ae'anai pefe'. ¹⁷Ea' asapa' Timoti nafe'mago ipe'. Anan nogalome ae'anai wanda' maol Dembinai. Anan numafi maol anama andeande'. Ae' okom nailana endilisi, dei' asapa'ana ma nambimb nefela ukup ipe'imi ma basef mihi'ambepa fe' pe ae'ami aila waf Kraisi. Ae' awalipa esis amam nematawa Godi sape wambel anama hiagoma ma basef maloma waf ae'anai ea' amama atom.

¹⁸Ipe' enipa ukup ma'i ae' nambimb ina efo'oitilipa ea' dei' pesambala basef ae'ami. ¹⁹Owa'etin. I'i Dembinai ni'i a'e, na'ama efe'mago ipe' mehip. Ea' ae' ina efe'mago ipe'ma egawa basef amam masambala basef ae'ami ma'iami atom, owa'. Basef amamumi hapaimi. Ae' a'i efo'ogawa waf naloma maina maol Godi amam manda'anai. ²⁰Dei' main, ofagema amama ma epes isima suwis wambota Godi numafias, amama ina amamaga ma'iam etin, owa'. Amama ina basef atom, owa'. Amama pepel Godi atona. ²¹Ipe' ukup ma'i maina waf, pa'i efa'ago bumbulita okom wandafunai efo'o ma ihi'ambepa, o pa'i efa'ago waf okom nainailipa efe'mepago? Amama nomonas ipe'imi atom.

Waf aonai so'a waolanai nape Korin

5 ¹Anom basef matagama ae' ma'i waf anama aonai so'a waolanai napoma ipe'. Waf aonai endilisi nahambombaga daso'amai, waf anama epes isima sololama Godi ina sanda' anona waf aonai na'amai, owa'etin. Waf anama na'ama. Anona aman naso' nemata'w komafianai ahalomana nase'akwi. ²Dei' ipe' ata' patopa' basef pafela agof ipe'imi atom ma waf anama aonai ma main? Na'ama owa'. Andeande'ma opalef ipe'imi mope si'ima lef ipe'inai ma pelopa waf anama aonai. Ipe' pili'amona aman anama nanda' waf anama ma ina ata' nope wapoti' nolomepa, owa'. ³Endilisi, alop ae'anai nape laogona ipe', ea' ambal ae'anai nape nalomepa. Ae' si'i endilisi ape alomepa ma awaloga waf aman anama nanda'anai aonai.

⁴Dei' a'iam na'ama. Nemaf anama ipe' pendakolasanai ma agel Dembinai Jisasi, ambal ae'anai noloma pepel Dembinai ape'inai Jisasi amama mope molomepa nemaf anama. ⁵Ape' miliamonago aman anama nefe'mago Satana nohambombaga alop noloma okom apinai ananinai. Monda'am na'ama ma God nofa'ai ambal aman anama nemaf Dembinai akutainai.

Esis Korin sokwahago yis amama apimi womun etina aman anama aonai nanda' so'a wauli

⁶Ipe' patopa' basef pafela agof ipe'imi atom lu'um pati waf anama aonai napomepa, amama ina waf bu'unai, owa'etin. Ipe' pegawa ea' basefa mi'uli anama ma yis amama manda' bret natifi na'i, "Yis kwawie'im manda' bret hianai hi'alana natef lu'una."

⁷Ea' ipe' pekwaha yis amama apimi ma pepan si'i bret dambainai yis a'anai, si'i endilisi ipe' pataga epes dambaipi. Dei' main, sipsip sondolali sahanama gwa'aimi lu'wami Pasovai anan Krai, esis sahana naga' ea', si'i sondolali gwa'aimi mafis maima God.

⁸Ape' monda' gwa'aimi amama lu'wami Pasova, ape' ina mofa' yis amama apimi, owa'. Amama si'i waf aonai. Ape' mofa' bret wafinai yis a'anai, amama si'i waf ukup bu'wamunai basef endilisimi.

⁹Anom basef ali' anda'am mafe'ma ipe', a'iam na'ama. "Ipe' ina pefala epes isima sanda' waf aonai so'a waolanai pi'i alupusi, owa'."

¹⁰Ae' ina a'iam pekwaha epes isima sanda' waf aonai so'a waolanai, o epes isima kowalasa amamaga enis epesi o epes isima sanda' wali o sahabombaga enis epesi soloma isima sanda' lotuma god baso'omunai, owa'. I'i ipe' pi'i pekwahis endilisi, pekwaha etap anae' hi'ilana. ¹¹Ea' basef dei' anda'ami ofagema na'ama. I'i anona aman ipe' pefalona owalomepa ipe'inai nonda' waf aonai so'a waolanai o kowalanama amamaga enis epesi o nonda' lotuma god baso'omunai, ni'i basef neso' alafuga enis epes, nea' embel nohaga nogoul, nonda' wal, nohabombaga enis epes, ipe' ina pefalona alupunai ipe'inai pi'i basef pelomana, owa' hapainai. Ipe' ina pea' gwa'aimi peloma epes na'amaisi wapoti', owa'.

¹²⁻¹³Maol sowaloga epes sape ande'ma siosi ina maol ae'anai, owa'. God atona anona nemaf nowaloga waf epes isima. Ea' maol sowaloga epes sape nomoni, amama maol ipe'inai, ipe' penda'ana. "Ipe' galo'manago aman aonai nape la'afena ipe' nanda' waf aonai."

Kristen ina sonda' kotima sahin owan, owa'

6 ¹I'i enin epen la'afena ipe' nenda' basef mila enin epen, ina andeande'ma epen inima netopa'ma esis amam nematawa Godi sope ma nefe' nenda' kota naep amam dembemi jas mololama Godi. Na'ama owa'. Andeande'ma epen inima ambal aona nefe' nenda' kota naep amam jas mololama Godi. ²Ape' amam nematawa Godi anona nemaf mowaloga waf epes hiesi etapasi hi'ilas. Ipe' pegawa amama o owa'? A'i ipe' owa' la'ifipama ata' pewaloga basef so'umi mamumami ipe'imi? ³Ape' anona nemaf mowaloga waf amam enseli wapoti'. Ipe' pegawa amama o owa'? Amama atom dei' la'ifipa endilisi ma pewaloga basef amamaga ipe'imi. ⁴Ea' i'i ipe' anom basefa amamaga ipe'imi, ipe' pendandepa anom amam agof a'ami ma sios ma mowaloga basef amama. ⁵Ae' anda' basef amama ma monda' ambagof ipe'imi aom. Dei' main? Gawaimi ipe'imi hiami mape la'afena ipe' amam la'ifima mowaloga anom basef motaga la'afena sahin owan bias ipe'isi. ⁶Ea' dei' enin epen alipini nanda' kotima sahin owan ananini ma naep amam dembemi jas owa' mombale'efa Kraisi.

⁷Ipe' panda' kotima esis alupisi ea' amama atom dei' sihi'amba ae' ipe' pewa ea'. Dei' maina owa' pepe pitalisa sonda'mepa waf aonai? Ea' owa'

pi'i aho'mas sofa' anom amamaga ipe'imi? ⁸Penda'am na'ama owa'. Ea' ipe' panda' waf aonaima enis epes pefa' amamaga asasimi! Ipe' panda' waf na'amai ma esis alupusi endilisi ipe'isi etis.

⁹Emi egafis sanda' waf aonai, anona nemaf ina sefe' wambel Godi, owa'. Ipe' pegawa amama o owa'? Na'ama ipe' pembaso'ma ukup ipe'imi atom. Epes sanda' waf aonai ma so'a waola enis amam nematawa saloma epes isima sanda' lotuma god baso'omunai saloma epes sahambombaga waf daso'amainai saloma amam amama ukup ma'i waf nematawainai saloma amam amama manda' waf aonai maloma anom amami ¹⁰saloma isima sanda' wali saloma epes kowalasa amamaga enis epesi sa'i sofa'am etini saloma epes isima sa' embel sahaga sagaol saloma epes isima sa'i basef awami findiwaimi ma enis epes ea' isima sanda' wal sahambombaga epesi, epes isima na'amaisi ina anona nemaf sefe' wambel Godi, owa'etin. ¹¹Fowa' enipa panda' waf anama. Ea' dei' God nasa'opepa nosahe'epa ea' Ananipei etipa si'ipa. God nanda'epa pataga epes bu'upe'i ma naep Ananimi. Anan nanda'epa na'ama etina agel Dembinai Jisas Kraisi ma Ambal Bu'unai God ape'inai.

Alop ape'inai nope bo'ona ma mefela agel Godi

¹²Endilisi, anom basef mape ma'i, "Amamaga hiami andeande'ma ae' enda'am."

Ea' amamaga amama nambimb enda'ami ina migiambame, owa'. Basef amama ma'i, "Amamaga hiami andeande'ma enda'am."

Basef amama mape, ea' ae' ina i'i aho'ma anom amamaga mope lu'um mombale'e, owa'. ¹³Ea' enis epes sa'i, "Gwa'aimi amama, alopi atom ea' alop napoma nea' gwa'aimi atom."

Ea' amamaga amama biefim, alop naloma gwa'aimi, anona nemaf God nohambombagam atom hi'ilam. God ina nanda' alop ape'inai ma nonda' waf aonai so'a waolanai, owa'. Anan nanda'ana nonda' maol Ananinai atona bu'unai. Ea' Anan Dembinai ma alop ape'inai numafiana. ¹⁴Ama pepel Ananinai atona nafela Dembinai nohafel hi'agif ea' anona nemaf na'ama etina nofelapa mohafel hi'agif wapoti'. ¹⁵Alop ipe'inai alop wa'wa'ana Kraisi atona. Amama ipe' pegawam o owa'? Ea' dei' ipe' pa'i ae' etopa' anona alop wa'awa'ana Kraisi esana noloma alop ano'w nemata'w kwanda' so'a wauli? Owa'etin! ¹⁶Amam emi egafim mofa' alop amamunai mosana noloma alop ano'w nemata'w kwanda' so'a wauli, amam mataga alop etifina maloma akwa'w. Ipe' pegawa amama o owa'? Dei' main, Baibel na'iam ea' waf anama daso'amainai bu'unai na'i, "Esis bias sataga alop etifina ma waf anama."

¹⁷Ea' emi egafis sope la'ifis soloma Dembinai, sataga ukup etifim salomana, si'i epen atotona.

¹⁸Ipe' pekwaha waf aonai so'a waolanai pefa' pefe'. Anona waf hianai aonai sanda'ana alop ande' atogon. Ea' epen nanda' waf aonai so'a

waolanai nanda' waf aonai ma alop ananinai atona. ¹⁹Alop ipe'inai ipat bu'unai Ambal Bu'unai Godi. Ipe' pegawa amama a owa? Ambal anama nosahe'epa ea' nape nomona ipe'. Ipe' ina ipe' etipa, owa'. Ipe' ananipei etipa si'ipa. ²⁰God natalepa ma maol lu'unai endilisi. Amama atom dei' pefela agel ananinai lu'una ma alop ipe'inai.

Waf sandaso'amainai

7 ¹Dei' a'i egwamepa basef amama pahali'iami panda'am mafi'i. I'i anona aman owa' noso' ano'w nemata'wi, andeande'.

²Ea' waf naninani aonai ma so'a waolanai nape. Ea' dei' andeande'ma amam nematawa hiesi atona etin sondase'ama deindei.

³Alop amani akwa'w waulu'mana kumafiana. Aman ina nonda'imana ni'i ananinai, owa'. Ea' na'ama etina alop waulu'manai, alop anan waulunama'w akwa'unai. Akwa'w wapoti' ina kunda'imana kwi'i akwa'unai, owa'. ⁴Nemata'w ina kope dembe'wi kumafi alop akwa'unai, owa'. Aman akwa'unai numafiana. Ea' na'ama etina aman ina nope dambenai numafi alop ananinai, owa'. Akwa'w waulu'mana kumafiana.

⁵Ipe' bipa pandase'ama ea' anan ina newa' alafuga akwa'w nonda'ima alop ananinai, owa'. Ea' akwa' wapoti' ina kowa' alafuga anan, owa'. Ea' i'i ipe' ukup mope etifima pihi'ama alop nogota bandana ma penda' beten, ipe' pi'i aho'ma penda' beten endilisinai. Ea' penda' alop nondaloma wapoti'. Na'ama ukup mose'epama pimafi alop andeande' ea' Satan nogwambepa penda' waf aonai.

⁶Basef amama ae'ami ma amam nematawa sandaso'ama mape na'ama. Ea' basef amama ina la'ifima pilam la'ifipa, owa'. Amama basef kwaie'um a'ipipam agiambamepa.

⁷Ae' okom na'i ipe' amam nematawa hipei pepe si'i ae' Pol apan, owa' eso' nemata'w. Ea' God nase'as amamaga bu'wami presen mandandas deindei'. Anona anona presen, anona anona presen.

⁸Ea' esis amam nematawa owa' seandaso'amai saloma nematawa alifiwai amam maga' makwahowa wapani, amama na'ama. I'i ipe' pepe etin si'i ae', andeande'.

⁹Ea' i'i owa' la'ifipama pepe andeande' pimafi opalef moloma alop ipe'inai andeande', pendase'ama. Waf ipe' pandaso'amainai, anama andeande' nikila' waf ukup mohafel la'ifipa ma waf aonai so'a waolanai.

¹⁰⁻¹¹Ea' esis amam nematawa sandaso'ama ea'i, ae' a'ipasa mi'uli anama. Anama ina mi'uli ae'anai atona, owa'. Mi'uli anama Dembinai. Ano'w nemata'w ina kokwaha aman akwa'unai, owa'. Ea' akwa'w kwi'i kokwahona, kope na'a. I'i owa', kotanima kofe'ma anan wapoti' kolomana kope okom etifina. Ea' anona aman wapoti' ina nokwaha waulu'mana anani'wi, owa'.

¹²Ea' dei' a'ipa ipe' na'ama a'i. Basef amama ina basef Dembinai, owa'. Amama dei' a'ipipa na'ama a'i i'i fowa' esis bias owa' ata' sombale'efa

Krais ma sandaso'ama sili', ma dei' anan nagil' nembale'efa Kraisa akwa'w kwi'i aho'ma kose'ana kolomana kope, anan ina nokwaho'w owa'.

¹³I'i akwa'w ato'w dei' kugil' kombale'efa Kraisa nase'akw, ma ni'i a'e nope noloma'w, akwa'w ina kokwahona, owa'. ¹⁴Dei' main, aman owa' nombale'efa Kraisi nape la'ifina naloma waulu'mana kombale'efa Krais, anan nataga andeande' si'i God nandandepana ea'. Ea' nemata'w owa' kombale'efa Kraisi kwape kwaloma anan nombale'efa Krais, akwa'w kwataga andeande' si'i God nandandepa'w ea'. I'i owa', anona nemaf sola awasi, ina anona nemaf sotaga bo'wes, owa'. Ea' dei' sape andeande' si'i God nandandepas ea'.

¹⁵Ea' emi epen owa' nembale'efa Kraisa ni'i nekwaha waulu'mana o waulunama'w, enin nefe'. I'i waf anama notaga na'ama ma esis isima ipe'isi sahalomepa o owalomepa aman nemata'w, esis ina ata' la'ifis sape si'i sanda' kalabus, owa'. God nofalapa ma mila wafa opaf awanena.

¹⁶Nemata'w, ine' anona nemaf la'ifinama nigiangbama waulunamena notaga Kristen o owa'? Amama ine' owa' neagawam. Ea' ine' aman wapoti', anona nemaf la'ifinama nigiangbama waulu'mena ine'ikwi kotaga Kristen o owa'? Amama ine' owa' neagawam.

**Maina maol manda'ana nemaf God nofalapa mataga
Ananipei, ape' monda' maol anama atona**

¹⁷Maim opeh bu'wami Dembinai naso' enin epen, enin nepe la'ela'ef nenda' amama atom nali' nanda'ami. Ae' a'ipas mi'uli anama etina esis Kristen hiesi sios sape wambel hiagoma.

¹⁸A'i anona aman amam mali' matopa'mana alop ananinai ma God dei' nofalana? Wila' anan ina nofana melet anama alop ananinai wapoti' nombaho'ana, owa'. Ea' aman emi ina meatopa'mana alop ananinai ma God dei' nofalana, amam ina motopa'mana alop ananinai, owa'. ¹⁹Waf matopa' alopantai naloma waf owa' meatopa' alopantai wapoti' falafunai atona. Ea' waf saila mi'uli Godi anama waf endilisinai. ²⁰Ipe' papoma maina maol bu'unai God dei' nofalipei, pepoma anama atona la'ela'ef. ²¹I'i ipe' agof a'ipei panda' maol pape owina enis epes ma dei' God nofalipei, ipe' ina ukup aoma amam, owa'. Ea' i'i anona eafa pekwaha maol anama pepe wafifipa, na'ama andeande' pekwahona.

²²Dei' main, emi egafis agof a'as sanda' maol sape owina enis epes, dei' epes isima Dembinai nakwahomas waf aonai sepe wafifis ea' Ananisi etis. Ea' na'ama etina epes sape wafifis owa' seape owina enis epes, dei' Dembinai nofalas ea' sanda' maola Krais. ²³God natalepa ma maol lu'unai Ananinai. Ea' ipe' ina pepe owina epes etapasi penda' maolanas, owa'. ²⁴Ipe' alupipei, maina maol epen inima nali' nanda'anai ma God dei' nofalan enin nepoma maol anama atona ma naep Godi.

Basefa amam nematawa owa' seandaso'amai

²⁵Amam nematawa isima ata' owa' seandaso'amai, ae' mi'uli Dembinai owa'ma ie'ipas ea' awalapa nomonas ae'ami atom a'ipipa. Anan nati uwahipiwi nagiambame ea' nanda'e anda' maol Ananinai andeande'. Ea' ipe' peme' basef ae'ami andeande'. ²⁶Ama nogota anae' dei' nimanimi lu'wami mataga, na'ama ipe' andeande'ma ipe' hipei pepe na'ama etin si'i dei' pape. ²⁷Ine' nali' naso' nemata'w ea', ina nokwaho', owa'. I'i ine' ata' owa' neaso' nemata'wi, ina okom ni'i ano'w nefa'akw owa'.

²⁸Ea' i'i ine' nefa' nemata'w, ina nanda' waf aonai, owa'. Ea' i'i nemata'w awiawai'wi kwoso' aman, akwa'w ina kwanda' waf aonai, owa'. Ea' amam nematawa sandaso'amai esis anona nemaf sofa' nimanimi lu'wami etap anae'. Andaiwa'ma nimanimi amama meatagamepa.

²⁹Ipe' alupipei, a'i basef ae'ami ofagema na'ama. Dei' nogota anae' ea' bandana ma etap anae' na'i higililona. Amama atom dei' ipe' amam paso' nematawai pepe si'i nematawa a'ipei. ³⁰Ea' epes isima sawa salifi sope si'i isima owa' sowa salifi. Epes sandanifel sope si'i isima ina sandanifeli. Ea' isima satala amamaga sope si'i sumafi amamaga amama na'a, owa' asasimi. ³¹Epes isima sanda' maola amamaga etapami, sope si'i isima owa' ukup mimila amamaga etapami. Dei' main, ape' mogawa, ina nogota laona, amamaga amama hiami moloma etap anae' anona nemaf mefe' hil'ilam.

³²Ae' a'i ipe' opalef mope awanem, andaiwa'ma amamaga mamumami mohambombaga ukup ipe'imi. Amam owa' measo' nematawai ukup matamea ma maol Dembinai ma'i monda' amamaga Dembinai okom na'iami. ³³Ea' amam amama maso' nematawai, ukup amamumi matamea ma amamaga etapami atom. Ma'i monda' hiahaoma awo wauhiamawa ukup awaumi ma'iami. ³⁴Ea' ukup amamumi mandawal biefim. Ea' nemata'w awiawai'wi ata' owa' kweaso' aman, okom natanea endilisi ma maol Dembinai. Akwa'w okom na'i konda' maola Dembinai atona. Ea' nemata'w kwaso' amani, okom natanea ma amamaga etapami atom kwa'i konda' waf waulunama'w okom na'ianai. ³⁵Ae' a'i basef amama ma igiambamepa pepe andeande'. Amama ina mohopa eaf ma ipe', owa'. Ae' a'i ipe' pepe andeande' penda' waf bu'unai penda' maol Dembinai atona ma anom amamaga ina momboma ukup ipe'imi, owa'. Ipe' pepe ukup etifim endilisi.

³⁶I'i anona aman okom na'i anan ina nanda' waf bu'unai ma nemata'w awiawai'wi esis sandandepamana'wi ea' okom ananinai nohafema akwa'w ma owa' nieti anona eaf, anan nila okom ananinai nose'akw, ea' andeande'. Anan ina nanda' waf aonai, owa'. Esis bias sondase'ama. ³⁷I'i anan owa' okom biefina ma akwa'w, nope la'ifina okom ananinai andeande' ni'iam ni'i akwa'w kope etin, na'amai andeande'. ³⁸Ea' emi

aman nasol' nemata'w anani'wi ea', anan nanda' waf bu'unai. Ea' emi aman ata' owa' nease'akwi, anama nanda' waf bu'unai endilisi.

³⁹I'i anona aman nasol' nemata'wi ina dei' naga', nemata'w akwama anani'wi ata' kwape la'ifikw kwalomana. Ea' i'i waulunama'w akwa'unai noga', ina ata' anom amamaga motagamo'w, owa'. Akwa'w okom na'i kwoso' aman dambainai wapoti', wila kose'ana. Ea' akwa'w koso' aman Kristen. ⁴⁰Ea' ae' okom na'i na'ama. I'i akwa'w kope na'a, kondanifel endilisi. Koso' aman dambainai, ina kwandanifel, owa'. Okom ae'anai a'i basef amama ea' ae' okom na'i ae' wapoti' efa' Ambal Bu'unai Godi nape ae' nihi'ambe basef amama.

Mafis saham sondolalimama god baso'omunai

8 ¹Dei' ae' a'i i'i basefa mafis saham sapefelam god anama baso'omunai. Endilisi, “Ape' hiapai mogawa”, si'i ipe' pa'iam. Gawa anama atona wafinai nafelai waf safela agof asasimi atom. Ea' i'i ape' ukup mimila sahin owan, amama migiambamapa motaga Kristen la'ifipai. ²I'i anona aman okom ni'i anan gawainai, owa'. Anan owa' ata' nogawa andeande'. ³Ea' emi epen okom nainaila Godi, God nogawa epen inima ea' ananinai atona.

⁴Waf sa' mafis saham sondolali saso' god baso'omunai ina waf endilisinai, owa'. Waf anama ikwaf atona wafinai. Ina god baso'omunai nape, owa'. God endilisinai anan atona nape. ⁵Endilisi, amamaga hiami sofalam sa'i, “Dembami.” I'i endilisi ma amam amama sofalam sa'i, “god baso'omunai” mope ilif etap, ⁶ea' hapaimi. God ape' manda' lotumanai atotona nape. Anan God ahalomapa, anan atona ofagonama amamaga hiami. Anan ofagema ape' mape etap anae', manda' maol ananinai atona. Ea' Dembinai atotona nape, anan Jisas Krai. Lagel ananinai atona dei' God nanda' amamaga hiami mataga mape. Krai atona nanda' ape' mataga mape dambaipai.

⁷Ea' enis epes ina sagawa amama, owa'. Epes isima fowa' saila god baso'omunai. Ea' dei' sa' mafis amama sondolali saso' god baso'omunai, ukup asasimi mapoma mafis amama sa'i, “Amama endilisimi,” ea' sa'am. Ea' basef mape opalef asasimi nomon ma'iami mihi'amba esis sanda' waf aonai ea'. Dei' main, esis ina ukup matamea andeande' sa'am, owa'. ⁸Ea' gwa'aimi amama ina mofa'apa mefe' felefe'ma God, owa'. I'i ape' mundaiwa'ma gwa'aimi amama, ape' ina nambimb mope awepa ma naep Godi, ea' i'i mea' mafis amama, ape' ina nambimb motaga bu'upai mikila' fowa' mape, owa'. Ape' mape wafifipa ma mi'uli anama fowa'inai na'i gwa'aimi amama.

⁹Ea' ipe' pindumafuma andeande'. Na'ama amamaga amama ipe' pape andeande' panda'ami monda' epes isima owa' la'ifisi sowa ma waf aonai. ¹⁰Ine' epen negawai, i'i nefe' ipat anama sanda' lotuma god baso'omunai

nepe nea' gwa'aimi, ma enin epen okom ananinai owa' la'ifinai ma bale'ef ananinai nitilina. Atuwasi nefela okom ananinai nea' gwa'aimi amama saso' godami, o owa'? Ape' ina mogawana. ¹¹Ine' okom na'i epen inima bale'ef ananinai ina la'ifina ma Krai's naga' nofa'an netanimani. Na'ama gawa ine'inai nenda'ana newa ma waf aonai. ¹²Ukup enis sahin owan alupusi ina la'ifim, owa'. I'i ipe' penda' waf anama aonai pehambombaga bale'efa ukup asasimi, ipe' panda' waf anama ma Krai's atona. ¹³Ea' i'i gwa'aimi maim monda' alupunai ae'anai newa ma waf aonai, ae' ina ata' ea' mafis amama wapoti', owa', hapaimi. Na'ama enda' enin newa ma waf aonai.

Pol nandanifel ma owa' nofa' anom amamaga ma maol aposel nanda'anai

9 ¹Dei' ae' a'i ihali'ipa efela ukup ipe'imi. Ipe' pa'i ae' ape wafifiwi ape aposel ati Dembinai Jisas ea' o owa'? Ae' anda' anama atona dei' ipe' pataga Kristen, o owa'? Endilisi. ²I'i enis epes ukup ma'i ae' ina aposel, hapaisi. Ipe' wila. Ipe' pembale'efa Dembinai pape la'ifipama Anan. Amama atom dei' ipe' etipa si'i anona ikwaf nihi'ambepa pegawa ae' ape aposel anda' maol Dembinai.

³Ea' anom epes mape manifa ae' ma'i ae' endilisiwei o falafuwei. Ea' agwamama basef na'ama. ⁴Endilisi afa' aposel andeande'ma ofa' gwa'aimi maima maol afa' wanda'anai. ⁵Ea' andeande'ma oso' nematawa Kristen ofe' olomawa si'i anom aposel maloma amam owapana Dembinai Jisasi maloma Pita manda'am. ⁶Ina andeande'ma ae' eloma Barnabas atofa onda' maola ofa' otamba afa'imi, ea' enis epes ipe' etipa pigiambamas pimafiasa otamba. Na'ama owa'.

⁷Maina aman nanda' maol soldia anan atona notala gwa'aimi maim ananimi? Ea' emi epen nawa gwa'aimi aof ama anan ina nofa' gwa'aimianai? Emi epen nimafi bulmakau ma anan ina nea' nomagofa amam? Owa'etin. ⁸Ae' aila ukup epesi a'iam na'ama? Owa'. Mi'uli God fowa' naso' Mosesanai na'iam na'ama etin. ⁹Moses nanda' basef mape mi'uli Godi ma'iam na'ama ma'i, "Bulmakau manda' maol mafa'asa oleleb witim mandilamam ma'i mea' anom, ipe' ina pesopama malogof amamumi, owa'."

Ipe' pa'i God okom napoma amam bulmakau atom a' amon? Owa'etin. ¹⁰Anan okom na'i ape' wapoti'. Basef amama ma'iam ape' atepa. God okom na'i waf anama. Epen nawa nelemb etap ananinai neloma emi epen nela gwa'aimi maof ea'i, anan okom na'i opaf ananinai ma nefa' amamaga tu'wanima maol anama. ¹¹Afa' wanda' maol Godi wape na'ama etin. Afa' wawa amamaga bu'wami Ambal Bu'unai Godi nase'afami la'afena ipe'. Ea' ipe' wilama pese'afa anom amamaga pigiambama alop afa'inai ma amama ina ahifima ipe', owa'. ¹²Ipe' pase'am amamaga anom amam mawalipipa basef Godi, ea' afa' dei' wape wa'imama? Afa' wapoti'

pese'afa amamaga ipe'imi, andeande'. Dei' main, afa' wali' wanda' maol wagiambamepa.

Ea' amamaga amama afa' wa'i aho'ma ofa'ami, afa' ina ofa'am, owa'. Fowa' dambadamba afa' wali' wafe'mago ipe' wafi'i wafi'i wataga dei', afa' wandaiwa'ma owahopa eafa basef bu'wami Kraisi. Amama atom afa' wandaiwa'ma ofa'am. Amama atom dei' nimanimi hiami matagamafa.

¹³Dei' ipe' ukup mi'i anom basef. Amam manda' maol ipat lu'unai Godi mofa' gwa'aimi ipat anama. Ipe' pegawa amam manda' maola balata anama sondolalima mafisanai ma God, amam wapoti' mofa' mafis to'wanima balata anama. ¹⁴Ea' na'ama etin Dembinai nanda' mi'uli anama nape. Emi amam mawalapa basef bu'wami Godi, amam ata' mofa' amamaga ma esis amam nematawa sofa' basef bu'wami ma sigiambama alop amamunai.

¹⁵Ea' ae' ina efa' anom amamaga amama, owa'. Dei' wapoti' ina anda' basef amama ma i'ipipa ae' andeande'ma efa' anom amamaga ma ipe', owa'. Andeande'ma ae' ili' ega'. Ae' andanifel anda' maol Godi agiambamepa ea' ina efa' anom amamaga amama. Andaiwa'ma anin epen netofa danifel ae'anai ma efela agel ae'anai ma waf anama, owa'. ¹⁶Ea' ae' ina efela agel ae'anai atona awalapa basef bu'wami Godi, owa'. Ae' owa' anona eafa esopama malogela i'ipasam, owa'. Okom ae'anai nahafel endilisi ma a'i i'ipasam etin. I'i ae' owa' ewalapa basef amama bu'wami, na'ama God nese'e nimanimi lu'wami. ¹⁷I'i okom ae'anai atona enda' maol anama Ananinai, owagama efa' otamba ma maol anama. Owa'etin. Ae' owa' anona eaf, anda'am etin. Dei' main, anama anona maol God nase'eana ae' anda'anai. ¹⁸Owagama efa' maima anama anda'anai? Ae' efa' amamaga amama bu'wami na'ama. Ae' anda' waf anama bu'unai atona. Amamaga ae' wila ma efa'ama maol anama, amama ina efa'am, owa'. Ae' awalapa basef bu'wami Godi ase'asam na'a. Ae' ina efalasa amamaga otamba maima sese'e si'i mi'uli Godi na'iam, owa'.

Pol nafe' owina amam nematawa hiesi ma nigiangamas

¹⁹Ae' ina anda' maol ape owina anin epen, owa'. Ae' ape wafifiwi. Ea' okom ae'anai atona anda' ae' ape si'i afe' owina epes hiesi ma efa'ai hiesi sondahama ikwafa pepel ae'anai sefe'ma God. ²⁰Amama atom dei' naep esis Judai ataga si'i Juda, ma efa'ai enis Juda. Ae' ina afe' owina mi'uli God naso' Mosesanai, owa'. Ea' naep isima sape owina mi'uli anama, ae' wapoti' afe' owina mi'uli anama ma efa'ai epes isima sefe'ma God. ²¹Ea' naep epes isima sololama mi'uli anama ina Judaisi, ataga si'i epes isima sololama mi'uli anama ma efa'ai epes isima sefe'ma God. Ea' ae' ina okom nase'e ma mi'uli Godi, owa'. Dei' aila mi'uli Kraisi. ²²Ama naep epes isima ina la'ifisi, ataga si'i esis ama efa'ai epes ina la'ifisi. Ae'

ataga si'i efa' waf epes hiesi endondomba iaguf hiami ma efa' enis epes sotanimani. ²³Ae' anda' maol anama ma efela agel basef bu'wami Godi ma anona nemaf efa' amamaga amama bu'wami epes isima saila basef amama sofa'ami eloma enis epes Godi wapoti'.

Ape' masagih mehipa mefa' amamaga bu'wami

²⁴Ipe' pegawa epes sasagih sandahawaipama etini hiesi sasagih safe' ea' etitin nikila'as nefa' amamaga bu'wami. Ipe' pegawa amama o owa'? Ea' ipe' wapoti' pesagih mehipa pefa' amamaga amama bu'wami. ²⁵Emi egafis sa'i sisagih sikila' ikwaf anama, sanda' maol la'ifinai endilisi sandameme'ma alop asasinai nimeguf hiami. Epes isima sanda'am na'ama ma sofa' amamaga bu'wami kwaie'um mape nogota bandanai. Ea' ape' Kristen manda'ama mefa' amamaga bu'wami mape la'ela'ef hihifi. ²⁶Amama atom ae' asagih. Ea' ina ati ganigani, owa'. Naep mati ikwaf atona asagih afe' mehipe ikila' hiesi ataga ikwaf anama ma efa' amamaga bu'wami. Ae' ape si'i anona aman nanda' boksen napa'i, ina nakwaha lagof mafe' ganigani noha uf atona, owa'. ²⁷Ae' la'ifiwi aha alop ae'anai nataga la'ifina nape owina okom ae'anai. Na'ama ewalapa basef bu'wami ma enis epes, ea' owagama ae' ina efa' amamaga bu'wami, owa'.

10 ¹Alupipei, ae' andaiwa'ma ipe' ukup mose'epama amamaga amama. Esis bafasapa hiesi Israel sape owina elagw amama mali'as safe' ea' hiesi safe' bo'wagah asasimi sowala sambo naoh embel akwahimi ²sawisa elagw maloma naoh embel safe'. Amama mondola'wifa sofa' baptais sape saloma Moses salomana nao'was safe'. ³Ea' esis hiesi sa' gwa'aimi amama God nase'asami, ⁴sa' embel amama God nase'asami. Esis sa' embela owap anama God nase'asami nafe' nalomas. Owap anama nondola'wifa Krai atona. ⁵Ea' God nandaiwa'ma hiesi sape saloma esis. Amama atom dei' saga' hi'alas etap anama wafiguma.

⁶Ea' amamaga amama hiami mataga mihi'ambapa si'i anona ikwafa ape' motolom mogawa ma ape' ina ukup mimila amamaga awami si'i esis fowa' sanda'am, owa'. ⁷Ipe' ina ukup mimila god baso'omunai si'i esis fowa' sanda'am, owa'. Baibel na'i esis na'ama na'i, "Amam nematawa sape sanda' gwa'aimi embel sa'am sohafel salemb etin sanda' salamal ki de'iaf sape."

⁸Ape' wapoti' ina monda' waf anama aonai so'a waolanai si'i esis fowa' sanda'am, ama nemaf atotona esis 23,000-peleis saga' hi'alas. ⁹Ea' ape' ina mogwamba God si'i esis fowa' sagwambana ma iguf awami mahasa saga' hi'alas, owa'. ¹⁰Ipe' ina ukup aom mi'i diga wandafunai peloma God si'i esis fowa' sanda'manam God, ma ensel anama naha epes saga'i nafi'i nahas saga' hi'alas, owa'.

¹¹Amamaga amama hiami matagama esis, amama si'i anona ikwafa ape' dei' mape nogota anae' felefele'ma na'i hi'ilana. Amama si'i anona ikwafa

ape' motolona mundumafuma andeande'. Na'ama monda' waf aonai si'i esis. ¹²Ea' emi egafis si'i esis etis situ la'ifis, esis sundumafuma andeande'. Na'ama sowa ma waf aonai. ¹³Amamaga meagwamba ipe'i, amama ina anom deiam, owa'. Amama na'ama etin si'i gwamba matagama epes hiesi. God naila basef ananiami endilisimi nanda' amamaga ananiami andeande'. Anan ina nambimb ni'i aho'ma amama meagwamba ipe'i motagama ipe' mikila' pepel ipe'inai, owa'. Nema'f anama amama motagamepa, God nonda' anona eafa nigiamamepa pitu la'ifipa.

**Ape' ine' mila god baso'omunai noloma ambagof
awami moloma God wapoti', owa'. Hapaimi**

¹⁴Ipe' alupipei endilisi ae'ipei, ipe' pekwaha waf anama pailana god anama baso'omunai, pewa' alafugaha anan. ¹⁵Ipe' pegawa, dei' a'ipipa. Ipe' etipa pewaloga basef amama ae'ami. ¹⁶Kap anama aman numafi lotuwi nofalo'mana, anama na'ama. Ape' manifela Goda kap anama nakolasa ape' maloma esimbel Kraisi. Endilisi etis bret anama ape' mawalonai, anama nakolasepa maloma alop Kraisi. ¹⁷Bret atotona. Amama mihi'ambapa amam nematawa hiapai mape si'i alop atotona. Dei' main, ape' hiapai mandakolas mandao'oma ma' bret atotona.

¹⁸Ipe' ukup ata' mopoma esis Israel. Epes isima sa' gwa'aimi mafis sondolali ma God balata anama sandatama sape etifigin saloma Goda balata anama. ¹⁹Basef ofagema do'ok a'ipipami ma'i main? Gwa'aimi mafis maim sondolalima god baso'omunai endilisimi? Amam god anama baso'omunai endilisimi? Ae' a'iam na'ama? Owa'etin. ²⁰Ae' a'iam a'i amamaga esis sololama Godi sondolalima god baso'omunai, ina sondolali ma God, owa'. Ae' andaiwa'ma ipe' pendakolas peloma god anama baso'omunai, owa'. ²¹Ipe' ina pea' embela kap Dembinai noloma kap god baso'omunai wapoti', owa'. Ea' ina pea' gwa'aimi balata Dembinai moloma gwa'aimi balata sondolali ma god baso'omunai wapoti', owa'. ²²Ape' ina monda' maol molomas ma god baso'omunai monda' okom Dembinai aona ma ape', owa'. Ape' ina mi'i ape' la'ifipai mikila' Dembinai, owa'.

²³Ipe' pa'i, "Andeande'ma monda' amamaga mamumami hiami."

Amama endilisi, ea' ina amama hiami magiambamapa, owa'. Ipe' pa'i, "Andeande'ma monda' amamaga mamumami hiami."

Ea' ina amamaga hiami manda'apa mataga la'ifipa ma bale'ef, owa'. ²⁴Ipe' ina ukup mopoma ipe' etipa pindumafuma pepe andeande', owa'. Ipe' ukup mopoma enis epes wapoti' ma pigiambamas sope andeande'.

²⁵Mafis^a hiami satalom stowa, amama ipe' penda'am. Ina ukup mope hiahiam pindahahali'mam, owa'.

a Pol nandaiwa'ma esis Kristen sape Korini sonda' hahali'ma mafis amama sondolali ma god baso'omunai. Na'i hapaimi, esis sogwa'am.

²⁶Dei' main, “Etap anae' naloma amamaga hiami, amama Dembinai atom.”

²⁷I'i enin epen owa' neambale'efa Kraisi nefalepa ni'i pefe' pelomana pea' gwa'aيمي ma pi'i peafe', andeande'. Pefe' pea' gwa'aيمي amama enin nandandombama neasi'ipami. Ipe' ina ukup motamea hiahiam pendahahali'mam, owa'. ²⁸Ea' i'i enin epen nili' ni'ipipa ni'i, “Mafis amama sondolalima god baso'omunai”, ipe' pegawa basef ananiami ina pea'am, owa' hapaimi. Ipe' pi'i uwahipin epen inima. ²⁹Ae' ina a'i ipe' peme' basef mape opalef ipe'imi nomon ma'iami pilam, owa'. A'i pila basef mape opaf ananinai nomon ma'iami epen inima na'ipipei. Na'ama enin epen ni'i, “Ae' ape wafifiwei. Dei' maina okom enin epen ina la'ifina nohopa ae'? ³⁰I'i ae' inifela Goda ea'am, dei' maina enin epen nehopa ae' ma ea' mafis amama anifela Godami? Na'ama ae' andaiwa'.”

³¹Dei' ae' egwa basefa epen inima. I'i ipe' pi'i pea' gwa'aيمي embel maim o penda' maim amamaga, penda'ama pefela agel Godi atona lu'una. ³²Ipe' ukup mopoma epes hiesi, esis Juda soloma esis owa' Judaisi, soloma amam nematawa isima Godi. Ea' ipe' ina penda' anona waf nonda' esis sowa ma waf aonai, owa'. ³³Si'i ae' wapoti' anda' maol lu'unai ma igiambama epes hiesi ma ukup mi'i waf bu'unai hianai ae' anda'anai. Ae' ina anda'am agiambama ae' imafi ae' atowe, owa'. Anda'ama agiambama amam nematawa hiesi ma God nofa'as sotanimani.

11 ¹Ipe' okokoma waf ae'anai pila ae' si'i ae' okokoma waf Kraisi ailana.

Waf sase'ala balagah ma sanda' lotu

²La'ela'ef ipe' okokoma ae' paila basef amama hiami a'ipipami. Basef amama efa'ami dei' a'ipipam ipe'. Amama atom dei' anifelipa a'i panda' waf bu'unai endilisi.

³Dei' ae' a'i ipe' pegawa basef amama. Agilinai amam hiami anan Kraisi atona ea' agilinai ako'unai waulunama'w atona ea' agilinai Kraisi God atona. ⁴I'i emi aman Ambal Bu'unai Godi nefelona na'ipasa basef Godi si'i profet o nanda' beten ama siti anan nase'ala balaga, aman anama nanda' agel Kraisi nowala. ⁵Ea' emi nemata'w wapoti' Ambal Godi nafelo'w kwa'ipasa basef Godi si'i profet o kwanda' beten ama owa' kose'ala balaga ako'unai, akwa'w wapoti' kwanda' agel waulunama'wi aona. Amama na'ama etin si'i kwando balaga ako'unai hi'alana. ⁶I'i nematawa owa' ose'ala balagah awaumi, awo otopa'am bandam. Waf ape' hiapai nape na'ama. I'i ambagof aoma weatopa'am bandam o ondowam hi'ilam, ape' ma'i waf anama aonai nanda' nematawa ambagof aom. Dei' amama atom andeande'ma awo ose'alom.

⁷Amam ina mose'ala balagah amamumi, owa'. Dei' main, God nanda' amam mandati si'i Anan ama mowalapai pepel lu'unai Ananinai. Ea'

nematawa wawalapai pepel lu'unai amami. ⁸Dei' main, God ina nanda' amana alop nemata'wi, owa'. Anan nanda' nemata'wa alop amani. ⁹Ea' amama wapoti', God ina okom na'i nemata'w dei' nanda' amana nagiangbama akwa'w, owa'. Anan okom na'i aman dei' nanda' nemata'wa kwagiambamana. ¹⁰Amama atom dei' nematawa ose'ala balagah awaumi ondola'wifa ope owina amam wauhupawa awoumi. Awo ose'alam ombaho'ama umbamahawa ma amam ensel motolowa.

¹¹Ape' mape la'ifipama Dembinai mape na'ama. Ina nemata'w ato'w kope aman a'akw aman atona nope nemata'w a'ana, owa'. ¹²God nanda' nemata'wa alop amani ea' na'ama etin dei' nanda' amam mataga alop nematawai. Ea' God ofagonama amamaga amama hiami hi'alam.

¹³Dei' ipe' etipa ata' pewaloga basef amama. I'i nematawa ina ose'ala balagah awaumi onda' betena God, amama andeande' o owa'? ¹⁴Waf ape'inai amam nematawai atona nihi'ambepa na'ama. I'i amam balagah laumi, amama manda'am ambagof aom. ¹⁵Ea' i'i nematawa balagah mopaiwa, andeande', balagah si'i sosaf bu'unai awaunai. Dei' main, God atona nase'awa balagah laumi awo ma moso'ala balagah awaumi. ¹⁶Ea' i'i emi epen nesmbala basef amama, anan negawa ape' ina maila anona waf, owa'etin. Maila waf anama atona. Ea' esis amam nematawa Godi hiesi dei' sailana na'ama etin.

Esis Korin sahambombaga gwa'aimi Dembinai

¹⁷Ae' a'i i'ipipa anom basef ma ipe', ea' ae' ina efela agof ipe'imi, owa'. Nogota anama pandakolas panda' lotu, amama mahambombagepa. ¹⁸A'i ili' i'ipipa amama. Nogota anama ipe' pandakolas panda' lotu, ipe' pandawal etin. Ae' ame' basefa ipe' na'ama. Ea' ae' okom na'i endilisi ipe' pandawal, o owa'? ¹⁹Endilisi, ipe' pandawal etin pa'i waf anama bu'unai ma emi egafis saila basef endilisi sotaga sondawalap alihis? Owa'etin. ²⁰Nemaf anama ipe' hipei pandakolas, ipe' ina pefa' gwa'aimi Dembinai, owa'. ²¹Ipe' hipei atona etin mehip pali' pa' gwa'aimi ipe'imi atom. Ea' anin nolomahan nape, ea' enin epen na' embel wain hianai nahaga nagaol. ²²Ipe' ifagw a'epama pea' gwa'aimi embel maim? Ipe' pa'i amam nematawa Godi isima awasi falafisi etis? Ipe' pa'i penda' enis epes gwa'aimi a'asi ambagof aom? Dei' atuwasi i'i maim basefa ipe'? Efela agof ipe'imi? Owa'etin. Amamaga amama ipe' panda'ami ae' ina anifelipa efela agof ipe'imi, owa'.

Dembinai Jisas nase'ama gwa'aimi ananiami amam alupumi Ananiami

²³Basef amama ae' a'ipipami amama ae' efa'ama Dembinai atona. Amama na'ama. Owamb anama Judas nase'ama Jisas nafe' lagof amam naumbih, ma owamb anama Dembinai Jisas nafela bret ²⁴ea' nanifela God nawalona na'i, "Anama alop ae'anai, ase'epana agiangbamepa. Ipe' penda'am na'ama etin ukup okokoma ae'."

²⁵Amam ma'am hi'alam, Anan nafelai anona kap embel malanai nanda'am na'ama etin na'i, "Kap anama basef la'ifimi dambaimi ae'ami endilisimi atom. Basef amama esimbel ae'ami atom malo magiambamepa. Nimeguf hiami danda ipe' penda' amama pea' embel, penda'am na'ama ma ukup okokoma ae'."

Fowa' Jisas na'ipa alupumi ananiami na'ama. ²⁶Nimeguf hiami ipe' pea' bret naloma kap embel amama, ipe' pewalapa basefa Dembinai naga' motaga alihim mefe' mefe' motagama nemaf Anan niefi'ianai.

Emi epen nehambombaga gwa'aimi Dembinai, ofagema ananiami atom

²⁷I'i enin epen owa' okokom mili' andeande' ma nea' gwa'aimi amama bret naloma embela kap Dembinai nea'am na'a, enin nanda' waf aonai ma alop noloma esimbel Dembinai, ea' epen inima ofagema mopoma enin etin. ²⁸Ape' hiapai ata' muli' nomonas motamea andeande' mea' bret noloma embel kap amama. ²⁹Dei' main, i'i epen owa' nomonas motamea andeande' ma basef ofagema ma alop Dembinai ma enin nea' gwa'aimi embel na'a, ofagema mapoma epen inima etin. ³⁰Amama atom dei' amam nematawa hiesi ipe'isi owa' la'ifis ea' awes hianai nanda'as ea' enis saga' ma waf anama. ³¹I'i ape' muli' nomonas motamea andeande', anona nemaf ina anom ofagema motagama ape', owa'. ³²Ea' i'i Dembinai nihihia' waf ape'inai ma nogwa waf aonai ma ape', amama Anan nase'apa nimaniami nanda'apa mope andeande' ma anona nemaf ina higililapa moloma epes saila waf etapanai, owa'.

³³Ea' dei' ipe' alupipei ae'ipei, maina nemaf ipe' pendakolasa pea' gwa'aimi Dembinai, ipe' ata' pepe pehafa enis sifi'i. ³⁴I'i emi egafis nolomohas, esis ata' sili' sea' gwa'aimi ifagw اساسimi. Na'ama God nonda'mepa basefa ipe'.

Basef amama tu'wanim mapani ata' owa' i'ipipami, maina nemaf efe'mago ipe', i'ipipam.

Presen amamaga bu'wami Ambal Bu'unai Godi nasi'ipami

12 ¹Ipe' alupipei, ae' a'i enda'mepago basef amama ma presen amamaga bu'wami Ambal Bu'unai Godi naso' ipe' atona etinami. Dei' main, andaiwa'ma enipa ipe' ukup mololaipa ma amama. ²Ipe' pegawa ma fowa' ipe' ata' pape awepa ma pape panda' waf aonai pelolama God, nogota anama ipe' ukup maila god baso'omainai maima mahonde'ipei pailam owa' moga mie'i. ³Ea' ipe' pegawa emi epen Ambal Bu'unai Godi nafelan na'i basef, ina ni'i basef ni'i, "Jisas owagama higililana," owa'. Ea' emi epen Ambal Bu'unai Godi a'ani, enin ina anona nemaf ni'i basef ni'i, "Jisas Anan Dembinai," owa'.

⁴Presen anama bu'unai Ambal Bu'unai Godi nase'apana na'ai, anama hianai naninani. Anama Ambal Godi atona nase'apana. ⁵Maol Dembinai

hianai naninani nape, ea' Dembinai atotona nape numafiana. ⁶Waf hianai naninani manda' maolanai, ea' God atotona nase'apa pepel epes hiapai ma la'ifipa monda' maol anama hianai.

⁷Ambal Bu'unai Godi nawalapa pepel ananinai ma epes hiesi atona etina nagiangbama hiesi. ⁸Epen atitin Ambal Bu'unai Godi nase'an pepela nihi'ambamasa gawa hianai bu'unai naninani ma nowalapa basefa epes hiesi. Ea' enin epen Ambal Bu'unai Godi anama atona nase'ana pepela newalapa basef ofagema waf Godi ma esis amam nematawa sogawam andeande'.

⁹Ea' enin epen Ambal Bu'unai Godi atona nagiangbaman nembale'efa God nataga la'ifin nanda' maol ananinai andeande'. Ea' enin epen nefa' pepela nigiangbama epes isima awes nanda'asi sataga bo'wes. Ambal Bu'unai anama atona. ¹⁰Ea' enin epen Ambal Godi nagiangbaman nase'an pepela nenda' amamaga la'ifimi si'i God nanda'ami. Ea' enin epen Ambal Godi nafelan na'i basef Godi. Enin epen nefa' gawa ma newaloga ambagof mamumami hiami, bu'wami o awami. Ea' enin negawa ma na'i diga naninani hianai. Ea' enin epen negawa ma nemboma basefa diga naninani. ¹¹Ambal Bu'unai Godi anama atona nanda' maol nawalapa presen anama hianai. Ama okom ananinai atona nase'as presen anama bu'unai nafe'ma epes hiesi atona etin.

Ape' amam nematawa Godi si'i alop wa'awa'ana alop atotona

¹²Alop ape' epesi etifina ea' wa'awa'ana hianai ea' alop anama hianai lu'una sa'ona nafe' nail alop si'ina atotona. Krai wapoti' na'ama etin.

¹³Dei' main, ape' hiapai mofa' baptaisa Ambal Bu'unai Godi atotona. Nanda'apa mataga alop atotona, esis Juda saloma esis owa' Judaisi saloma esis sape wafifisi, saloma esis agof a'asi sape owina enis epes wapoti'. Ape' hiapai mofa' Ambal Godi atotona nape nalomapa la'ela'ef.

¹⁴Ape' mogawa alop ina etifina, owa'. Alop wa'awa'ana hianai. ¹⁵I'i bo'waga ni'i, "Ae' ina lagol ape alop si'ina, owa'." I'i bo'waga anama ni'i basef na'amani, ina andeande', owa'. Basef amama hapaimi. Bo'waga nape alop si'ina anama atona.

¹⁶Ea' aliga wapoti' ni'i, "Ae' ina naep ape alop si'ina, owa'." I'i aliga ni'iam na'ama, ina andeande', owa'. Basef amama hapaimi. Aliga nape alop si'ina anama atona. ¹⁷I'i alop hianai si'ina ea' naep atom hi'ilam, dei' neme' basef ni'imama? Owa'. I'i alop hianai si'ina aligah atom mope hi'ilana, dei' neme' alogw ni'imama? ¹⁸Ea' alop ina nataga si'i na'ama, owa'. God atona fowa' nogawa okom na'i alop atona etin lu'una sa'ona dei' nanda'ana nape nandahama si'i okom ananinai atona na'iam. ¹⁹I'i alop wa'ana nope anona alop etifina hi'ilana, alop anama si'ina ina nape alop endilisinai, owa'. ²⁰Alop ina nataga nandanda' na'ama, owa'. Alop wa'awa'ana sa'osa'ona hianai, ea' alop si'ina etifina.

²¹Naep ina la'ifima mi'ipa lagof mi'i, "Afa' wandaiwa'ma ipe' pepe pelomafa. Afa' atofa ope, andeande'."

Ea' balaga wapoti' ina la'ifima ni'ipa bo'wagah ni'i, "Ae' andaiwa'ma ipe' pepe pelome, owa'. Ae' atowe epe, andeande'." Owa'etin.

²²Alop anama wa'awa'ana falafuna ape' ma'i owa' la'ifina, i'i anama owa' nondala nope, anona nemaf alop anama si'ina ina la'ifina, owa'.

²³Ea' alop anama wa'ana ape' ambagof awamunai, ape' mofalo'mana endilisi mumafiana andeande'. ²⁴Ea' alop wa'awa'ana owa' ambagof awamunai, anama ape' ina mofalo'mana mumafiana na'ama, owa'. Alop anama wila ma nandala nape. God atona nasa alop anama wa'awa'ana hianai nail etifigin nataga alop atotona. Alop wa'awa'ana hianai agof a'anai God nandana nataga bu'unai. ²⁵Anan nanda'am na'ama ma alop anama ina anona nemaf nondawal wa'awa'ana, owa'. Alop anama hianai wa'awa'ana nimafiana atona etin. ²⁶I'i alop wa'ana neme' ekepehana, alop hianai si'ina atuwasi neme' ekepehana na'ama etin. I'i enis epes sinifela wa'ana, hianai si'ina nondanifel hi'ilana nolomana.

²⁷Amama atom dei' ipe' hipei pape alop Kraisi si'ina. Ea' ipe' hipei atona etin alop wa'awa'ana ananinai atona. ²⁸God nahapona enis epes ananisi sape na'ama ma sios. Mali'i aposel, sagi'i profet, safe'ma wenifi, esis tisa sawalipasa basef ofagema Godi. Ea' sagi'ma amama epes isima sanda' betena sanda' la'ifimi si'i God nanda'ami. Ea' epes isima sanda' awes nanda'asi sataga bo'wes wapoti' ea' esis isima sagiambama enis epesi, saloma amam mumafi maol siosi naninani hianai saloma isima sogawa ma si'i diga naninani hianai. ²⁹Dei' ipe' ukup mape ma'imama? Ipe' pa'i amam hiami mape aposel atom? Pa'i amam hiami mape profet atom? Ipe' pa'i amam hiami mape tisa atom? Pa'i esis hiesi sanda' amamaga la'ifimi si'i God nanda'ami? ³⁰Pa'i esis hiesi sofa' presen anama bu'unai ma sonda' awes nanda'asi sataga bo'wes wapoti'? Pa'i esis hiesi sogawa ma si'i diga naninani hianai? Pa'i hiesi sogawa ma somboma basefa diga anama naninani? Owa'etin. ³¹Ea' ipe' hipei ukup mohafela pefa' presen amamaga bu'wami mali'i.

Ea' dei' a'i ihi'ambepa anona eaf bu'unai nikila' endilisi presen anama hianai.

Ape' ukup mimila enis amam nematawa endilisi

13 ¹I'i ae' egawa ma i'i diga naninani epesi soloma enseli wapoti' ma ae' owa' okom mimilas ese'asa okom igiambamas, basef ae'ami falafumi atom si'i saha olef wata malef etini. ²I'i Ambal Bu'unai Godi nose'e presen amamaga bu'wami nefele ma ewalipasa basef Godi ma egawa okom hiami Godi mape mandamabahi'i hi'ilam, ama egawa gawa hianai wapoti', ma embale'efa God la'ifiwi endilisi ma la'ifiwi ma i'ipama halafutagw mindiki'ah mefe' gani to'wan, ea' ae' owa' okom ninila esis amam nematawa endilisi, ae' falafuwei atowe. ³I'i ae' ese'asa amamaga hiami ae'ami hi'ilama esis isima kwahusima hiahaom ma

enda' maol Godi i'i aho'ma enis epes sandaiwa'ma Godi si'i sehe sofe nif ega'. Ea' ae' owa' okom ninilas ese'as opaf, ea' hapaimi. Anona nemaf amamaga amama hiami ina migiambame, owa'etin.

⁴Emi egafis ukup maila enis epes endilisi, esis sanda' waf bu'unai na'ama. Esis ina mehipe sagwamasa waf aonai esis sanda'masanai, owa'etin. Esis sape satilis. Esis sati epes hiesi uwahipis sagiambamas. Esis ina kowalasa epes amamaga hiamisi, owa'etin. Ea' ina safela agof asasimi atom, esis ina ukup ma'i esis etis, owa'etin. ⁵Esis ukup maimailas sape andeande'. Esis ina ukup mapoma amamaga asasimi endilisi, owa'etin. Esis ina ukup wandafum mehipe, owa'. Ea' ina ukup mapoma waf aonai enis epes sanda'masanai, owa'etin. ⁶Esis ina sandanifel ma waf aonai ikiakanai, owa'etin. Esis sandanifel ma waf endilisinai bu'unai atona. ⁷Nimeguf hiami dondol esis sanda' waf anama na'ama. Esis ukup mape awanema maina nemaf sefa' nimanimi lu'wami. Esis sagiambama epes alifisi saloma epes isima ena la'ifisa sagiambama esis etisi. Esis sombale'efa God endilisi sape sehafana ma nigiangbama esis soloma enis wapoti'. Esis saitua la'ifisa nimanimi matagamas.

⁸Waf anama ukup maimaila enis epes endilisi, anama anona nemaf ina higililana, owa'etin. Ea' waf anama Ambal Godi nafelapa ma mowalapa basef ananiami, anama anona nemaf higililana hi'ilana. Presen anama bu'unai ma epes sogawa sa'i diga naninani, diga anama anona nemaf hi'ilana. Presen anama epes sogawa ma waf Godi, gawa anama anona nemaf hi'ilana wapoti'. ⁹Dei' main, dei' ata' mogawa gawa tu'wanina atona. Presen anama Ambal Bu'unai Godi nafelasa sowalapa basef ananiami si'i profet, basef amama wapoti' ata' tu'wanim atom. ¹⁰Ea' anona nemaf amamaga God okom na'i meataga migi' endilisi motaga, nemaf anama amamaga amama dei' motaga tu'watu'wanim atuwasi hi'ilam. ¹¹Fowa' ae' ata' ape si'i awani a'i basef si'i awani. Ae' ameme'ma amamaga si'i awani. Ea' nemaf anama ataga dambewe, akwaha waf anama fowa' ape so'uwe anda'anai. ¹²Dei' mati amamaga mataga, ea' ina mandawalap alihim endilisi, ata' owa'. Mataga si'i mapela embel mati ambal atona. Ea' anona nemaf owagama nemaf dahandahama motaga, muti naep alihim. Dei' ata' egawa tu'watu'wan atom. Ea' nemaf anama egawa amama endilisi si'i God nogawa ae'.

¹³Dei' waf wenifina nape, anama na'ama. Waf mombale'efa Kraisi naloma waf mope mohafa God, waf ukup maimailasanai. Waf anama wenifina. Ea' nali' endilisi, waf ukup maimailasanai.

Presen amamaga bu'wami Ambal Bu'unai Godi nase'apami

14 ¹Ipe' la'ifipa pili' ukup mila epes hiesi pese'asa opalef esis. Ea' ukup ipe'imi mohafel endilisi ma pefa' presen anama bu'unai Ambal Bu'unai Godi nase'apanai. Ea' presen nali'i ma ipe' penda' maol

la'ifipa pefa'anai, anama na'ama. Presen Ambal Godi nefelega ma pewalapa basef Godi si'i profet. ²Ape' mogawa emi egafis sa'i basefa diga naninani esis ina sa'ipa anom basef epes, owa'. Sa'i saloma God atona. Dei' main, ina enis epes sagawa diga anama, owa'. Pepel Ambal Godi atona esis sa'i basef amama fowa' mape mandambahi'i. ³Ea' emi egafis Ambal Godi nafelasa sa'i basef Godi si'i profet, epes isima sa'ipam sanda'am sa'ipasam sanda'as la'fisa sombale'efa Dembinai ea' sa'ipas safelasa sonda' waf bu'unai nonda' opalef asasimi awanem. ⁴Emi egafis sa'i basefa diga naninani, esis sanda' esis etis sataga la'ifis. Ea' emi egafis Ambal Godi nafelas sawalapa basef Godi si'i profet, isima sanda' esis amam nematawa Kristen sataga la'ifis. ⁵Ae' okom na'i ipe' hipei pi'i basefa diga naninani. Ea' emi egafis Ambal Godi nafelasa sowalapa basef Godi si'i profet, esis sikila' epes isima sa'i basefa diga naninani owa' sombomam si'iam alihim. Dei' main, i'i epen inima owa' nembomam ni'iam alihim, basef amama ina mihiambama esis amam nematawa Kristen sotaga la'ifis, owa'. Ea' i'i nembomam alihim, basef amama mihiambamas sotaga la'ifis.

⁶Alupipei, ipe' ukup mopama basef amama andeande'. I'i ae' efe'mago ipe' ma i'i basefa anona diga, atuwasu igiambamepa petaga la'ifipa pi'imama? Owa'etin. Ea' i'i embomam i'ipipa anom basef God nihi'ambepam i'ipipa gawa bu'unai ipe' iwalipipama basef ofagema Godi si'i profeta Ambal Godi nefela ae' ie'ipipami.

Ape' mowalapa basef Godi alihima diga

⁷Amamaga ambal a'ami, si'i batagw moloma gita, amama na'ama etin si'i diga anama hianai. I'i amam owa' mogal melef monda' maguf mamumami motaga, atuwasu membe' aligah mogawa maguf amamumi alihim mi'imama? Owa'etin. ⁸I'i bugel alof owa' nogal ni'i alihina, amam monda' wandafi mundamafuma mope mondandombola wandaf mi'imama? Owa'etin. ⁹Ipe' wapoti' na'ama etin. I'i ipe' pi'i basefa anona diga esis owa' sogawanai, atuwasu sogawa basef amama ofagema si'imama? Owa'etin. Atuwasu basef ipe'imi mefe' hi'ilam etin. ¹⁰Endilisi, naninani nape etap anae'. Ea' ina anona diga falafunai atona, owa'. Basef ofagema mape diga naninani hianai. ¹¹I'i ae' owa' egawa basef ofagema enin epen na'iami, atuwasu anan okom nopoma ae' ni'i ae' epen a'i anona diga anona wambel. Ea' ae' wapoti' okom napoma enin, i'i na'i anona diga anona wambel. ¹²Ipe' wapoti' na'ama etin. Ipe' ukup mohafel endilisi ma pefa' presen anama bu'unai Ambal Godi nasi'ipanai. Ea' ipe' penda' maol la'ifipa endilisi ma pefa' presen anama nagiambama eses Kristen sotaga la'ifis.

¹³Ea' epen emi na'i basefa anona diga, anan nenda' betena Goda nese'an gawa nemboma basefa diga anama. ¹⁴Dei' main, i'i enda' betena

anona diga, ambal ae'anai atona nanda' beten, ea' okom ae'anai nape etin. ¹⁵Ea' dei' enda'am i'imama? Ae' enda' betena ambal ae'anai eloma okom ae'anai wapoti'. Ae' enda' awalefa ambal ae'anai eloma okom ae'anai wapoti'. ¹⁶⁻¹⁷I'i ipe' pinifela Goda ukup ipe'imi atom, ama epen owa' nefa' presen anama bu'unai Ambal Godi nasi'ipanai, dei' anan negawa ni'imama ma beten anama ipe'inai ma nie'i endilisi? Owa'etin. I'i ipe' penda' beten pi'i basef bu'wami endilisi, ina pigiambama epen inima netaga la'ifin, owa'. Dei' main, anan ina negawa basef amama ipe'imi, owa'. ¹⁸Ae' anifela God nimeguf hiami ma ae' a'i basefa diga naninani. Ipe' ina la'ifipama pikila' ae' ma presen anama, owa'. ¹⁹Ea' nemaf anama epe eloma esis amam nematawa mondakolas, ae' a'i i'i basefa amef bandami wenifim biefima okom ae'anai ihi'amba esisa sogawam. Ea' i'i ae' i'ipasa basefa amef laumi motaga hihif si'i 10,000 peleima anona diga na'iami, ea' hapaimi, falafumi atom.

²⁰Ipe' alupipei, ipe' ina pepe ukup motamea si'i awasi, hapaimi. Waf aonai, ipe' ukup bo'om motamea andeande' ukup mose'epam si'i awasi. Ea' nomonas ipe'imi motaga si'i epes dembesi. ²¹Anom basefa mi'uli Godi mail buk ma'i,

“Dembina'i na'i, anona nemaf Ae' enda' enis epes anona wambota sa'i anona diga efelas si'ipasa basef ae'ami epes isima ae'asi, ea' esis ina nambimb sila basef amama, owa'.”

²²Dei' mogawa presen anama pa'i basefa diga naninani, anama ina ikwaf God nanda'ana esis sombale'efanai, owa'. Anan nanda'ana epes isima owa' sombale'efanai. Ea' presen anama Ambal Bu'unai Godi nafelepa pawalapa basef ananini si'i profet, anama ina ikwaf God nase'asana epes isima owa' seambale'efanai, owa'. Anama ikwaf isima sembale'efanai etis.

²³Ea' i'i esis amam nematawa Godi hiesi sondowa'anima etifigin ama ipe' hipei pi'i basefa diga naninani ma enis epes owa' sefa' presen anama o enis owa' seambale'efa Kraisi sifi'i sope solomepa, si'i, “Ipe' pahaga pagaoli.”

²⁴Ea' i'i Ambal Bu'unai Godi nefela ipe' hipei ma pewalapa basef Godi si'i profet ea' enin epen owa' nembale'efa Kraisi o owa' negawa basef Godi andeande'i nifi'i niwis, basef ipe' hipei atuwasi moha okom epen inima ea' moha opaf ananinai ma maina waf napaini. ²⁵Basef hiami mape mandambaho' okom ananinai, amama atuwasi motaga mondawalap alihima enin nifi'i nindiwa nembawa nitimalo' nefela agel Godi nowalapa basef na'ama ni'i, “Endilisi, God nape nalomepa.”

Waf sanda' lotuwanai notaga andeande'

²⁶Ipe' alupipei, dei' basef amama akutaimi ae'ami mape na'ama. Nemaf anama pendowa'anima, presen anama hianai Ambal Bu'unai Godi

nasil'ipanai napoma ipe' hipei na'ama. Enin epen nenda' anona awaf, enin epen ni'i anom basef Godi niwalipipa, enin epen God nase'ana anom basefa nowalapam, ea' enin epen negawa ma ni'i anona diga, ea' enin epen negawa ma nemboma basef ma diga anama. Ipe' penda' amamaga amama hiami ma pigiambama esis amam nematawa Godi sotaga la'ifis. ²⁷I'i enis ukup mohafela si'i basefa anona diga, bias o wenis si'i basef atona etin. Ea' ma'um amama. Ea' ina sokolasa malogof si'i, owa'. Si'iam atona etin. Amama ea' ma'um. Ea' enin epen atitin nemboma basef amama. ²⁸Ea' i'i owa' enin epena nembomam, epen inima na'i nie'i basefa anona diga feso'man nepan ma basef amama maina nemaf sanda' lotuanai. Atuwasi enin etin ni'iam neloma God.

²⁹Ea' amam profet biam o wanom Ambal Bu'unai Godi nafelama mowalapa basef Ananimi, amam mowalapam. Ea' anom amam mowaloga basef amama. ³⁰I'i enin epen tol nepe lotu neme' basefa God nihi'amban anom basefa epen inima, aman anama nali' naitu nawalapa basefi feso'mona nope. ³¹Ipe' hipei Ambal Godi nafelepa pawalapa basef Godi si'i profet, ipe' pewalapam atona etin pi'iam deindei' ma epes hiesi seme'am okokomama monda'as sotaga la'ifis. ³²Emi egafis sofa' presen anama Ambal Godi nafelasa sowalapa basef ananimi si'i profet, sumafi presen anama andeande'. ³³Dei' main, God ina ofagenama sa'i basef mamumami, owa'. Anan nanda' waf bu'unai opalef etifim mape awanem.

Wambel hiagoma esis amam nematawa Godi sondowa'anima sape, ³⁴awau nematawa ina witu wi'i basef, owa'. Awo feso'mawa ope etin. Sios amam nematawa Godi waf ea' anama atona. Nematawa ina ope uli'ma sios, owa'. Ope owin si'i mi'uli Godi na'iam. ³⁵I'i awo wi'i ogawa anom basef ofagema, atuwasi ofe'ma ifagw awaumi ohali' wauhupawa mi'ipawa. I'i ano'w nemata'w konda' basef ipe' sios pandakolas, waf anama ina andeande'.

³⁶Dei' a'i ihali'ipa. Ipe' ofagepama basef Godi? Ipe' etipa pefa' basef Godi ea' enis amam nematawa owa'? Owa'etin. ³⁷I'i emi egafis ukup mi'i Ambal Bu'unai Godi nafelasa sawalapa basef Godi si'i profet, o si'i esis sefa' anona presen bu'unai, esis sogawa basef amama dei' anda'mepami, amama mi'uli Dembinai. ³⁸I'i esis sindaiwa'ma basef amama, ipe' wapoti' pindaiwa'ma esis.

³⁹Ipe' alupipei ae'ipei, ukup ipe'imi mohafel endilisi ma Ambal Godi nefelega pewalapa basef ananimi si'i profet. Ea' ipe' ina pesopama eafa pie'i basefa diga naninani, owa'. ⁴⁰Nemaf anama ipe' amam nematawa pendowa'anima penda' lotu, ipe' penda' maol andeande'ma lotu ipe'inai notaga bo'ona.

Krais naga' ea' notanima nohafel wapoti'

15 ¹Ipe' alupipei, dei' ae' a'i efela ukup ipe'imi wapoti' ma basef amama bu'wami Godi ali' a'ipipami. Ipe' pefa' basef amama

atom dei' manda'epa pembale'ef paitu la'ifipa. ²Ae' a'lipipa basef amama bu'wami. I'i ipe' pembale'am andeande', God nofa'epa pitanimani. I'i owa', pembale'am ina pailam.

³Basef ali' ai'ipami, amama ae' fowa' ali' efa'ami. Amama na'ama. Krais naga'ma nakwaha awami ape' manda'ami, si'i Baibel fowa' na'iam. ⁴Ea' esis sofa'ana salana hi'agif. Ama nimeguf biam mafe' ea' nafe'ma wanomi, God nafelona wapoti' si'i Baibel na'iam. ⁵Ea' nali' natagama Pita ea' nagi' natagama alupumi aninimi 12-peleim. ⁶Ea' nataga nandawalapa esis amam nematawa Kristen hiesi satolona, isima alupusi saila anan hiesi endilisi sikila' 500-peleis. Dei' anda' basef amama mafe'mago ipe', a'i alupusi isima hiesi dei' enis sape, enis saga' ea'. ⁷Ea' natagama Jems natolona. Ea' natagama amam aposel hiami matolona. ⁸Ea', ae' agi' endilisi atolona wapoti', natagama ae' si'i awani mama'wan kolan awen.

⁹Dei' main, ae' si'i so'uso'win falafuwei la'afena amam aposel. Ae' ina dei' bo'awe ma epes sofale si'i ae' aposel, owa'. Dei' main, anda' maol ahambombaga amam nematawa Godi. ¹⁰Ea' God atona okom nainaili nigiabame na'a nanda'e ape andeande'. Ea' dei' ae' ape. Anan nigiangbame na'a, ae' anda' maol ape. Nanda'e la'ifiwi anda' maol Ananinai ikila' anom aposel. Ea' ina ae' atowe anda' maol, owa'. God nagiangbame na'a, amama atom dei' ape anda' maol anama la'ela'ef. ¹¹Ea' basef amama, ae' anda'ana o amam aposel manda'ana, basef amama bu'wami atom. Afa' hiafai wawalipipam ea' amama atom ipe' pame'am pembale'efam.

Anona nemaf epes saga'i sotanima sohafel wapoti'

¹²Afa' la'ela'ef wawalapa basefa Krais naga' ma God nafelona nohafel wapoti'. Dei' maina ipe' enipa pa'i basef amama pa'i, "Epes saga'i ina anona nemaf sotanima sohafel wapoti', owa'."?"

¹³Ipe' enipa pa'i endilisi esis saga'i ina sotanima sohafel, owa'. I'i basef ipe'imi endilisimi, Krais wapoti', God ina nafelona, owa'. Owa'etin. ¹⁴I'i endilisi God owa' nofela Krais, dei' basef amama afa' wawalapami falafumi atom ea' waf ipe' pembale'efa Krais falafunai atona wafinai. ¹⁵I'i na'ama, anom basef wapoti'. Dei' afa' otaga amam wambaso'ami wawalapa basef Godi. Dei' main, afa' wa'i basef alihim wawalapama God nafela Krais nohafel hi'agif wapoti'. Ea' i'i endilisi God owa' nofela saga'i, anan ina nafela Krais wapoti', owa'. ¹⁶Ipe' enipa pa'i God ina nofela epes saga'i, owa'. I'i basef ipe'imi endilisimi, God ina nafela Krais wapoti', owa'etin. ¹⁷I'i endilisi God owa' nofela Krais, dei' waf ipe' pembale'efa Krais ina la'ifina nigiangbamepa, owa'. Falafunai atona. Dei' ipe' ata' papoma waf aonai la'ela'ef. ¹⁸Ea' epes isima sape la'ifisi ma Kraisi saga'i, esis wapoti' hegililas hi'ilas. ¹⁹Ape' mombale'efa Krais ea' mape mohafa Anan. I'i mombale'efana mope mohafana anae', nimeguf mape etap anae',

mope aom endilisi mope migi!. Andeande!ma epes hiesi si'i uwahipis enis epes, ea' ape' mombale'efana si'i uwahipipa endilisi. Owa'etin.

²⁰Ina na'ama, owa!. Kraisi naga' dei' endilisi God nafelona nohafel wapoti!. Anan nohafel na'ama nali'ma epes saga'i si'i gwa'aimi mali' maofi. ²¹Dei' main, anona aman atotona nali' nawalapai waf epes saga'i, ea' na'ama etin anona aman nagi' nawalapai eaf anama saga'i sohafel wapoti!. ²²Amamaga amama na'ama. Epes hiesi Adami hiesi saga!. Ea' na'ama etina epes isima hiesi sape la'ifisa Kraisi, anona nemaf God nonda'as sotanima sohafel wapoti' sofa' ambal namunai ma sope namusi. ²³Ape' epes hiapai atona etin mope mohafa nogota ape'inai. Aman nali'i, Anan Kraisi. Anan si'i gwa'aimi mali' maufi. Ea' nemaf anama notanima niefi'ianai, ape' hiapai ananipai mohafel wapoti!. ²⁴Ea' nemaf akutainai notaga ma amamaga hiami awami higililam hi'ilam. Nemaf anama Kraisi nohambombaga la'ifimi hiami mamumami bu'wami awami mape ilif etapi hi'ilam, ea' nose'apa la'ifimi ananiami ma numafi amamaga hiami mefe'ma Ahalomana God. ²⁵Dei' main, Kraisi nope Dembinai King nefe' nefe' notagama nemaf Anan nohagofa naumbih hiami mofe' owina bo'wagah ananiami. ²⁶Anan nili' nohagofa naumbih amama hiami ea' nigi' nohagofa ga' endilisi si'i nautamana ananinai nape nagi'i. ²⁷Dei' main, fowa' God na'iam na'ama na'i, "Anona nemaf ae' enda' amamaga hiami moloma epes hiesi wapoti' sefe' owina Anan."

Basef amama ma'i God nanda' amamaga hiami mefe' owina Kraisi atona. Ea' mogawa basef amama ma'i amamaga hiami amama ina ma'i God, owa!. Anan nanda' amamaga amama hiami mape owina Kraisi. ²⁸Nemaf anama amamaga amama hiami mefe' owina Kraisi hi'ilam, ea' Nogalomana Godi atotona nefe' owina Anan nali' nanda' amamaga amama mafe' owina Kraisi. Ea' God nope nili' endilisima amamaga hiami moloma epes hiesi wapoti!. ²⁹Enis epes sati waf bu'unai enis Kristen sanda'anai sape la'ifisa naumbih sahas saga' ea' epes isima satilis sombale'efa Kraisi sofa' baptais. I'i epes saga'i anona nemaf owa' sohafel wapoti', epes isima sofa' baptaisa epes sa'i anona nemaf sogawa sotaga sope si'imama? I'i endilisi ma epes saga'i anona nemaf owa' sohafel wapoti', dei' maina isima sofa' baptaisa epes saga'i? Owa'etin. ³⁰Afa' wapoti', la'ela'ef enis epes sa'i sohambombagafa. I'i epes isima sa'i owa' sotanima sohafel, dei' maina afa' wanda'am wape na'ama? Owa'etin. ³¹Alupipei endilisi, ae' andanifel ma pape la'ifipama Kraisi Jisas Dembinai ape'inai. Ea' anom basef wapoti' endilisimi atom si'i amama. Nimeguf hiami la'ela'ef ae' ape si'i aga'i. ³²Ae' ape Efesus, anda' wandaf aloma mafis mape aolupi lu'wami.^b Amama atuwasi efa' amamaga bu'wami

b Basef amama ma'i Pol napa' naloma anom mafis wandafumi Efesus, amama basef womun etina enis epes sandaiwa'ma basef Godi sa'i sohana noga'.

i'imama? I'i endilisi esis saga'i owa' sotanima sohafel, si'i anom amam gawaimi ma'i, “Hapaisi, ape' mea' gwa'aimi moloma embela naman meaga'.”

³³Na'ama enis epes sombaso'mepa. Anom basef gawaimi ma'iam na'ama ma'i, “I'i mofe' moloma epes sanda' waf aonai, esis sohambambaga waf bu'unai ape'inai.”

³⁴Dei' ipe' pekwhaha ukup amama masi'ipei, pitanimani ukup mopan andeande'. Ipe' ina penda' waf aonai wapoti', owa'. Ae' enda'epa ambagof aoma anom basef dei' a'ipipami. Enis epes ipe'isi ina dei' sogawa God endilisi, ata' owa' etin. Ofagema amama ipe' etipa.

Alop nohafili, anona alop

³⁵Ea' anona aman atuwasi nohali' ae' na'ama ni'i, “Esis saga'i anona nemaf sohafel si'imama? Anona nemaf sofa' maina alop sohafel wapoti'?”

³⁶Anan nahali'ma basef na'ama okom nahaga nagaol. Dei' main, ape' mawa oleleb witim o amamaga, amama owa' meaga'i nambimb amama ina mope namum, owa'. ³⁷Amamaga amama mawami, amama ina mataga etifim si'i agof o soh maim, owa'. Ape' mawa nalelef atom o anom gwa'aimi. ³⁸Ea' God atona nanda' nalelef amama pepe'am mataga malo manda' soh afis maim magi' mataga mail si'i Anan atona okom na'i meataga. Ea' Anan atona nanda' lawah si'im maloma soh maima amamaga hiami ma gwa'aimi amama atona etin deindei'.

³⁹Alop hianai deindeiana ambagof mapainai ina etifina, owa'. Alop epesi anona alop, mafisi anona alop. Amigufi anona alop, agufi anona alop. ⁴⁰Ea' amamaga mape ilif heveni maloma mape etapi amama hiami mape. Ea' sosafa amamaga, sosaf naninani. Sosaf etapanai anona sosaf. ⁴¹Aon alipunai anona sosaf, owambunai anona sosaf. Ondowa anona sosaf, ea' ondowa wapoti' hiami mamumami.

⁴²Waf epes sa'i sohafel wapoti', anama na'ama etin. Alop ape' dei' mawanai, anama nambimb aona folo'olana. Alop nohafel wapoti', anama ina anona nemaf aona, owa'. Nope bo'ona la'ela'ef. ⁴³Alop ape' mawanai, anama aona folo'olana. Alop notanima nohafel wapoti', anama bo'ona endilisi. Alop mawanai anama ina la'ifina, owa'. Alop nohafel wapoti', anan la'ifina. ⁴⁴Alop anama mawanai, etapanai. Ea' alop notanima nohafel wapoti', ilifanai, Ambal Bu'unai Godi numafiana.

Alop anama biefina ilifanai etapanai nape. ⁴⁵Baibel wapoti' na'i, “Aman nali'i Adam nataga ambal namunai napaina.”

Ea' Adam nagi' natagai nataga Ambal Bu'unai ma nase'as ambal namunai epes hiesi. ⁴⁶Ea' alop ilifanai ina nataga nali', owa'. Alop etapanai nataga nali'. Ea' alop anama ilifanai nataga nagi'. ⁴⁷Aman nali'i, God nanda' etap nanda'ana nataga ambal napaina. Ea' aman nagi' natagai, Anan aman ilifanai. ⁴⁸Ape' epes hiapai etapapai, ape' mandati

na'ama etin si'i aman anama God nanda' etap nanda'anai. Ape' epes hiapai ilifapai anona nemaf motaga mundati na'ama etin si'i aman anama nafi'i heveni. ⁴⁹Dei' ata' mape si'i aman anama etapanai ea' anona nemaf mope na'ama etin si'i aman anama nafi'i heveni.

⁵⁰Ipe' alupipei, dei' a'ipipa basef amama bu'wami. Epes etapasi anona nemaf ina la'ifisa siowis wambel Godi, owa'. Amamaga etapami higililami ina anona nemaf la'ifima mope la'ela'ef, owa'.

⁵¹⁻⁵²Ipe' peme!! Dei' ae' a'i ewalapa anom basef mali' mape mandambahi'i ma ipe'. Anona nemaf ape' hiapai ina moga', owa'. Mehip alof akutainai nelef, ape' hiapai mondamboma mohof'of mondati na'apa. Dei' main, alof anama nelef ea' esis saga'i sohafel, anona nemaf ina ata' sog'a' wapoti', owa'. Ea' mope etap anae' wapoti' mondamboma mohof'of mondati na'apa. ⁵³Dei' main, alop anama mawanai anona nemaf notaga namona nope andeande' la'ela'ef. ⁵⁴Endilisi, alop anama mawanai anona nemaf notaga dambaina nope andeande' la'ela'ef. Ea' alop anama na'i anona nemaf nohafel nondati na'ana nofa' ambal namunai nope la'ela'ef. Nemaf anama anom basef Baibelimi motaga mondawalap ma'i, "God nahagofa ga' nikila' wandaf nanda'am hi'alam."

⁵⁵"Ine', ga', pepel ine'inai enima? Ea' wamba'w ine'inai hi'elinai enima? Owa'etin."

⁵⁶Wamba'w saga'manai nataga ma waf aonai ea' pepel ma waf aonai nataga na'ama. Ape' epes hiapai matopa' basefa mi'uli Godi hi'alapa. Amama atom dei' mi'uli anama nawalapai pepel ma waf aonai. ⁵⁷Ape' munifela God. Ama pepel Dembinai ape'inai Jisas Krai's atona God nagiambamapa nanda'apa la'ifipa ma dei' mikila' wandafa muli'amon'a waf aonai.

⁵⁸Ipe' alupipei ae'ipei endilisi, pepe la'ifipa andeande'. Ina umbamehepa petambel, owa'. La'el'ef pepe la'ifipa penda' maol Dembinai. Dei' main, ipe' pegawa maol anama panda'ana ma Dembinai, ina anona nemaf nowala etin, owa'.

Otamba magiambama amam nematawa Godi

16 ¹Dei' ae' anom basefa otamba ipe' pa'i pekolasoma peso' esis amam nematawa Godi. Ae' ali' ihi'ambas eaf sonda' maol anama ma esis Kristen Galesiaisi sandakolas deindei' ea' dei' a'i ipe' penda'am na'ama etin. ²Sande nimeguf hiami ipe' hipei atona etin ukup mi'i otamba pefa'ama wik nali'i ea' pewaloga otamba amama pembe'am dende' ma ipe' pefa'am mo'oh dei' pimafiam ifagw ipe'imi. Ama anona nemaf ipe' ina penda' maol lu'unai pegolopa otamba, owa'. ³Anona nemaf ae' etagamepa, ipe' pendandepa anom amama mofa' otamba amama mofe' Jerusalem. Ama ae' i'ipama basef amoma mofa'am esapa'am mefe'. ⁴I'i andeande'ma efe' wapoti', amam mofe' molome.

Pol na'i nefe' niti esis Korin

⁵Anona nemaf ae' efo'o ili' ewala etap hiagoma Masedonia, ea' efo'o etagamepa. Dei' main, ae' okom na'i ata' ili' ewala etap hiagoma Masedonia efe'. ⁶Ae' okom na'i ata' epe anom nimeguf elomepa. Ae' ina egawa, epe elomepa nimeguf ma'um nogota naoh mohafel lu'um ea' efe' maina wambel, ipe' pigiambame pimafi ma amamaga, pitumi pehapone eaf. ⁷Ipe' pegawa ae' andaiwa'ma efo'o itilipa nogota bandana, owa'. I'i Dembinai ni'iam na'ama, a'i epe anom nimeguf elomepa. ⁸Ea' ae' a'i epe na'ae Efesus efe' etagama nemaf anama Pentikos.

⁹Dei' main, God nausi'ame eaf nagal alihina ma enda' maol bu'unai eloma amam nematawa hiesi samboma opalef sembale'efa God endilisi. Ea' hiesi sandaiwa'ma sonda' maol anama.

¹⁰I'i Timoti nofo'o notagamaepa, ipe' pimafiana andeande' ma anan nope opaf bo'ona la'afena ipe'. Dei' main, anan nape nanda' maol Dembinai si'i ae' ape anda'ana. ¹¹Na'ama enin epen okom ni'i Timoti falafunai nese'ana alafuga, na'ama owa'. Ipe' penda' opaf ananinai nope awanena pese'ana amamaga pigiambamana pitumana pehaponana eaf ma opaf ananinai bo'ona nifi'mai ae'. Ae' epe ehafana noloma enis alupusi.

¹²Basef sahalomapa ape'inai Apolos mape na'ama. Nimeguf hiami a'ipana a'i anan ata' nolomago anom alupumi ata' mofo'o mitiagio ipe', ea' anan nandaiwa' endilisi ma nofo'o dei'. Nambimb anan niti Dembinai nonda' eaf, anan nofo'o.

Basef akutaimi Pol na'iami

¹³Ipe' pindumafuma andeande' pitu la'ifipa pembale'efa Krai. Ipe' ina umbamehepa, owa'. Pitu la'ifipa. ¹⁴Amamaga hiami ipe' penda'ami, ipe' ukup mimila God noloma epes hiesi.

¹⁵Ipe' pegawa wambota Stefanasi sali' sataga Kristen sali'ma esis Grik hiesi. Ea' esis ukup ma'ima'i endilisi la'ela'efa sanda' maol sagiambama epes Godi. Alupipei, ae' a'lipipa basef la'ifimi ¹⁶pepe owina epes isima soloma emi egafis sandao'oma sanda' maol anama. ¹⁷Dei' ae' endanifel ma Stefanus naloma Fortunatus maloma Akaikus amam mafi'mai ae'. Dei' main, ipe' ina nambimb la'ifipama pifi'i na'ae, owa'. Amam dei' miagiambame maho'ofepa mafi'mai ae'. ¹⁸Amam manda' opaf ae'anai nape bo'ona magiambame ataga la'ifiwi ea' magiambama ipe' wapoti'. Ea' andeande'ma ipe' pefela agof amam na'amaimi.

¹⁹Ea' amam nematawa Godi sape deindei' etap anama hiagoma Esia sanda'mepago nemaf bu'unai. Akwila naloma Prisila saloma esis amam nematawa Godi sandakolas etifigin ipat asasinai, esis wapoti' sanda'mepago nemaf bu'unai endilisi ma agel Dembinai. ²⁰Alupusi hiesi

sape na'ae sanda'mepago nemaf bu'unai ipe'. Waf amam nematawa Godi, ipe' hipei atona etin pese'ama lagof etin pelomago sahin owan ipe'isi.

²¹Dei' ae' Pol ahapila pen lagel ae'anai atona anda'mepago basef amama bandami atom. Ae' anda'mepago nemaf bu'unai ipe'.

²²I'i emi egafis sendaiwa'ma soso' opalefa esis Dembinai, okom ae'anai a'i anona nemaf God nohambomagago epes isima hegililas.

Dembinai ape'inai, ae' okom nohafel endilisi a'i ine' fi'i. ²³Ae' a'i okom Dembinai Jisasi nainaila ipe' nigiambamepa na'a nope nolomago ipe' nonda'epa petaga la'ifipa.

²⁴Ae' a'i okom lu'unai ae'anai nainaila ipe'i nefe'mago ipe' hipei palome mape la'ifipa paloma Kraisi Jisasi.